

# 民國叢書

第五編

• 95 •



---

---

# 民國叢書

第五編

· 95 ·

綜合類

茹經堂文集 (三一六)

唐文治著

上海書店

---

---

---

唐文治著

茹經堂文集

第六編

---

茹經堂文集六編目錄

卷一 雜著類

先<sup>考</sup> 忘日哀詩當哭丁亥

存夜思親翌日聞周太孺人節孝坊被燬悵懷感賦<sup>壬午</sup>

再記劉河石牌坊被燬文丁亥

無錫族伯子良公隱行善事三則丁亥

記太倉楊君俊承自戕殉職事丁亥

論世界之和與戰乙酉

論定國要策乙酉

政治道德論戊子

仁壽鑑乙酉

窮民歎丙戌

勸施衣施米並設施粥廠文丙戌

續勸施衣施粥文丁亥

勸居家勿鞭撻小兒說丙戌

南洋大學演說稿丁亥

無錫國專校友會春季大會訓辭丁亥

崇明沈同一先生同韻書屋祝辭戊子

太倉張嘯湖先生畫像題辭丙戌

江甯陳亮伯先生墨蹟題辭乙酉

無錫張嫻女士風雨勒斯圖題辭乙酉

如經堂文集六編卷一

雜著類

太倉唐文治蔚芝著

先考忌日哀詩當哭丁亥

人生盡孝爲至樂痛我養親非且薄膝下依依有幾時時光駟隙悲莫續父兮生我母兮鞠長我育我又顧復終歲劬勞知爲誰爲撫兒孫債稟歲歲敝凶寒風雪惡奔走稱貸猶不足瓶罄罍恥窮途哭兒身莫代罪莫贖追思往事淚盈掬嗚呼人生盡孝須及時毋如我生罔知覺哀哀夢我空廢讀

附記

先考忌辰係十二月二十四日先妣忌辰係十二月二十一日此數日中正文治椎心泣血之時也又按向例結賬必於歲杪文治家本貧寒六十年前此數日中正先考奔走借貸之時先妣患肝病亦正臥床憂慮而文治不能代親之勞言念及此愴焉欲絕憶文治二十年前作蔚蒿哭百首於從前況味亦詳敘其中人生盡孝須及時毋若文治之追悔無及也

春夜思親翌日忽聞周太孺人節孝坊被毀愴懷感賦用古韻

夢我三復涕縱橫罔極難忘願復恩寸草有心千尺恨劬勞祇向夢中尋近三廬大樹有廟房六間大

清心映月鬼神知節孝坊前拜祖慈昨夜三更淚如綆白雲飛越到瀏湄世祖斗光公所建遺刻聯云聖德齊天垂片石清心同月映

再記劉河石牌坊被燬文丁亥

家譜載遷妻始祖梁鼎公明末由金陵遷妻當在天啓崇禎間故老相傳梁鼎公墓舊在梅花坡原有六十畝迺遷向東南至土山石牌坊爲止牌坊爲欽旌節孝周太孺人遺蹟丁丑日寇內犯至劉河依山爲險掘大礮於上以抗國軍洎日寇降牌坊已倒毀文治於甲申年曾爲文以紀之近年來文治因衰老目眚又患膀胱炎不克赴劉屢囑族弟文鎔字子淦檢藏殘石又不知其檢得若干石刻尙有存否也嗚乎當戰事之興文治既無法護持追事平後又不克至劉躬自省視罪奚可辭擬懇族弟文濤字靜之專誠到劉察勘再切商修建之法而是坊之規模舊制常繫於夢寐間爰再紀之並哭之以辭曰

陟彼高岡追感蒼茫微特家業實惟國光巍峨片石矗立人間發帑旌淑聖德齊天日寇內熨乾坤爲愁石漱天驚乃汝世讎白雲流涕鬱伊靡既建復舊觀寤寐心鐫昭茲貞珉於千萬年

無錫族伯子良公隱行善事三則丁亥

一 對於育嬰事業愷惻慈祥以爲呱呱者得長成與否權實操於乳母特懸規章以緣督之設獎金以誘掖之親驗嬰孩肥瘠以勸懲之

一 於邑東北鄉嚴家橋創設施棺會又於邑東郊購基地創立義塚

一 每值歲寒凶荒有飢餓不能出戶者叩其門予以錢若干縑或訝其無因而至則曰吾昔日貸君錢君豈忘之乎或乘其不覺置錢於室隅卽匆匆去或探知貧戶他出叩門訪之其家爲烹茶款待時卽以錢置於茶几內卽揚聲曰請不必烹茶吾別有事去矣有錢在茶几內爲小實實買糕之資遂卽匆匆出門去然終不言眞姓名故其後嗣如星海君等均發達無限天心佑善洵不誣也

記太倉楊君俊丞自戕殉職事丁亥

君姓楊氏諱瑛字俊丞吾婁庠生幼廉潔自持志趣邁流俗當前清之季各省設立巡警學堂以謀自衛吾

蘇亦興辦警校當道檄各縣保送傑出人才入校肄業君應選卒業後邑令委辦本邑警務君之任釐訂章則綏靖閭閻踴躍風發洵時勢常周歷各鄉稽覈戶口緝捕奸宄曰保境安良吾之責也於是輿情愛戴當道嘉許之迭次獎勵由警務課長洊升警察所長敘一等警佐迨民國十三年遂有自戕殉職之事初民國二年夏南北戰爭事起滬軍自礮城退守太倉北兵窮追將入邑境訛言朋興情勢岌岌君偕邑令洪伯賢先生（名錫範）及當地紳商奔走獨資說南軍繳械泊北兵至優加犒勞得免戰禍邑中慶安堵其苦心調處厥功至大十三年江浙齊盧之戰吾邑地當衝要夏歷八月四日大軍齊集駐太蘇軍某旅長責令君限一日內拉民夫三百名用以輸送彈藥軍法森嚴急於星火君默然不應退則泣然自度吾何忍騷擾同鄉良民傳父老兄弟離散哭別耶吾死不過一家哭若拉夫則千家百家一路哭矣遂於是夜二時在任所寢室以自備手槍置胸前發彈自戕卒嗚呼方是時也草木淒悲鬼神泣泣悲哉壯哉翌晨邑中聞傳曰義士義士某旅長亦感動遂罷拉夫之役嗚呼晚近以來士夫見利則趨見害則避求一爲民禦災捍患者曾不數觀而君毅然舍生取義方諸古志士仁人何以過茲卒年四十母某氏至今健在年八十七當時鄉人有慰藉之者則曰吾子爲保衛地方人而死吾何憾乎遺孤三曰鼎華曰某曰某善人有後可以前知君卒後二十三年鼎華持狀來乞爲記余以君矯矯亮節不獨宜載邑志省志當達史館立傳亦吾邑之榮邦國之光也

論曰悲哉拉夫之慘也前齊慶元柄省政時飭役曰拉夫吾蘇有某姓四人祖母一子婦各一孫一年弱冠被強拉去其祖母思孫哭泣兼旬竟死其子亦恐被拉既痛其母又藏匿驚悸越數日亦死其婦無以爲活投水死噩耗傳知其子痛極亦投環死一家四人先後畢命余嘗作拉夫行以哀之載諸軍箴悲哉拉夫之慘也唐李遐叔曰蒼蒼蒸民誰無父母誰無兄弟誰無夫婦生也何恩殺之何咎讀其文思其慘狀有不潸



然出涕者乎今觀楊君殉一人之命保全數百家之性命仁哉義哉烈哉竊謂吾鄉之人宜尸祝而祠祀之也後之主持軍政者其亦以君爲矜式而造福於子孫黎民乎

論世界之和與戰乙酉

易乾卦言各正性命保合太和乃利貞余爲進一解曰惟乾坤和氣洋溢宇宙間而後人民各正其性命繫辭傳陳憂患九卦其一曰履德之基繼之曰履和而至又曰履以和行和之時義大矣哉蓋天敘天秩正德利用厚生惟和俱因和衷而定也天地中和之氣鍾於萬物人飲天之氣食地之味詎有不含和氣者反是則爲乖戾戾氣所積遂謂人生非爭不可由一家至一鄉由一鄉至一國相爭相奪相殺而靡所底止於是不顧民命乃奮出於戰孟子曰爭地以戰殺人盈野爭城以戰殺人盈城此所謂率土地而食人肉罪不容於死善戰者服上刑徵諸天道人事毫髮不爽梁惠王以土地之故糜爛其民而戰之又驅其所愛子弟以殉之是自殺其子也項籍百戰百勝至於受垓下之圍虞兮一歌悲愴欲絕是不啻自殺其婦也梁朱溫殺人無算至投清流士人於河海及其子漢（又名）爲唐莊宗所慘敗謂其近臣皇甫麟曰吾不能自裁卿可斷吾首麟遂殺漢亦自殺自古樂殺人而好戰者未有不轉而自殺其身及其子孫者也孟子又嘗曰殺人之父人亦殺其父殺人之兄人亦殺其兄然則非自殺之一間耳豈不信哉以歐洲言之遠代如拿破崙幽囚荒島近世如希特勒國破身亡皆可爲好戰嗜殺者之殷鑒無如乖戾之氣多祥和之氣少是以戰局日開吾民之受其劫運者脛懸於樹腸挂於壁其他折臂雉經流離轉徙之狀目不忍觀耳不忍聞而筆亦不忍述痛乎悲夫吾是以論和之利戰之害和之福戰之禍大聲疾呼以曉百世

余悲近時戰事無所底止爰作此文追脫稿敵降中日和平已實現遂錄之以爲後世殷鑒

茹經自記

論定國要策乙酉

乙酉秋孟或有問於余曰茲者世界太平矣敢問今日定中國要策宜何如應之曰余所持者卑之無甚高論惟有興廉務實二事而已自聖門發明利物和義以義爲利之旨孟子生戰國時復大聲疾呼七篇之書首辨義利而後世風俗日偷無有能信守之者大學明言仁者以財發身不仁者以身發財而吾國人專以發財二字爲口頭禪受其害者或隱喜而陽諱之心術卑鄙品行醜觀率由於此孔子曰慢藏誨盜老子曰多藏厚亡孟子曰去義懷利未有不亡世人視爲迂遠貪官汙吏盈天下而人類之相爭相奪相殺遂無已時故吾常謂吾國人好利之心一日不去中國恐無太平之望哀哉周官六事以廉爲本禮記曰臨財毋苟得臨難毋苟免蓋苟得之人未有不苟免者彼擁資鉅萬或數十萬或數百數千萬宮室之美妻妾之奉所識窮乏者得我豈有肯舍生取義之理故孟子曰此之謂失其本心苟清廉之風一振貪墨之吏嚴懲不貸譬諸霹靂當空妖魅自然遠遁此宋陸象山先生白鹿洞喻義喻利章講義及明王陽明先生拔本塞源論答毛副憲書學者不可不熟讀也余向倡讀經救國之論曾撰孝經孟子救世書儒林道學當一以貫之矣試讀近代曾文正公文集日記家書其腳踏實地兢兢業業爲何如風聞丁丑歲戰事初起時錫紳有向當道請軍械守城者則笑曰敵人豈有至無錫之理現在崑山兵力可支持七個月屆時大兵雲集彼小醜詎足道耶厥後崑山不特未持至七月卽七日并不能守此事雖未必確實然亦足徵放空氣之爲害孔子曰其言之不怍則爲之也難大言炎炎毫無實際以嚇吾民猶不可況以嚇外人乎哀哉或曰宣傳豈無功耶曰此尤貴有實際孰者宜宣傳孰者宜韜晦更宜謹慎斟酌易傳曰亂之所生也言語以爲階幾事不密則害成是以君子慎密而不出也風聞丁丑年常州鄉間某地卽因宣傳軍械充足致受轟炸哀哉宋邵子曰天下將治則尙行也天下將亂則尙言也夫言有枝葉已非治世所宜況虛聲洞喝乎況軍事要政乎故竭

力務實猶宜慎密不出況並無實際乎爰負臆見或者有當萬一知我罪我在所不計或曰子常言爲學行政均當有標準吾人爲斯世宜讀何書曰當讀陽明集要與余所撰陽明學術發微及近今坊間所印三名臣書牘誦其書尤當師其人

政治道德論戊子

或問政治與道德宜分乎宜合乎曰合則治分則亂治則盛亂則衰治則存亂則亡論語中有分言之者道之以政民免無恥道之以德有恥且格是也有合言之者所謂爲政以德譬如北辰居其所而衆星共之蓋言躬行道德心理統一而後土地始能統一否則民心渙而不聚土地亦豆剖而瓜分矣聖人答季康子曰政者正也子帥以正孰敢不正蓋言政治萌抵在正人心而欲正人心必先自正其心也或又問曰政之爲正既得聞之矣敢問人心曷由正乎曰明君子小人之辨而已矣君子喻於義小人喻於利義者道德之根源行而宜之之謂發之於政治大順乎人心所欲與聚所惡勿施也利者字義爲刈禾公其利則天下之美利也若私其利於一己則貪庸卑鄙心術欺詐刃立於旁其弊也因行政而殺人且轉而自殺并殺其子孫矣哀哉或有問曰義利之辨既得聞之矣敢問何由徙義而遠利曰祛人心中人之見而已矣聖人言吾道一貫曾子釋之曰忠恕蓋言合人己爲一貫卽政治之原理也是故聖人先人而後己賢者推己以及人愚不肖有己而無人先人後己處舜之舍己從人取人爲善與人爲善道德之極則也賢者推己以及人欲立而立人已欲達而達人也是愚不肖有己而無人我處於富貴利達之場而置四海困窮於不聞不問耽一己之安逸而罔知人之困苦求一己之尊榮而罔知人之詛咒詭譎之聲香顏色拒人於千里之外孟子引詩曰其何能淑載胥及溺此之謂也或又問人己之辨既得聞之矣敢問居今世而言行政宜何如曰興廢務實而已自聖門發明利物和義以爲利之旨孟子生戰國時七篇之書首辨義利大學明言仁者以

財發身不仁者以身發財而吾國人專以發財二字爲口頭禪或陽喜而陰用之此等齷齪之弊不除政治豈復有清明之望國家焉得有振作之時故今日惟有興廉而嚴懲貪墨譬諸霹靂震空妖魅自然遠遁若喜其爲我牟利逢迎諂媚而用之則民生日益憔悴國家日益阡危矣此余所撰紫陽學術發微陽明學術發微二書又茹經堂五訓及勸善編學者不可不熟讀也虛矜之氣最足以害國縱覽中外歷史虛矯者未有不敗實事求是者未有不興孔子告季康子曰政者正也子帥以正孰敢不正又曰子欲善而民善矣行政者其鑒諸故居今日而言道德言政治必當以明王陽明先生近代曾文正爲師吾中國庶幾有挽回之望陽明功業在明代震耀一時其全書未易卒讀而明施邦曜先生所編陽明集要及王文成全書宜三復精思也至曾文正與李申夫書教以取人爲善與人爲善二事每日載諸日記以自觀省余於三十年前以爲致太平者必求興廉務實體用兼備之士而國人曾莫之悟孟子言禍福無不自己求之者又曰七年之病求三年之艾其道維何亦曰仁義而已矣

仁壽鑑一壽己壽人壽世之方一乙酉

論語孔子言仁者壽而中庸贊舜之大孝則言必得其壽大德卽大孝也後漢延叔堅曰仁人之於孝猶之手足之有腹心枝葉之有根本也腹心定靜手足自然健強根本堅固枝葉自然峻茂孝經言事父孝故事天明事母孝故事地察天地明察神明彰矣又曰孝弟之至通於神明光於四海蓋孝子視於無形聽於無聲心思精細縝密從容純固通神明之德焉得而不壽繼之者其周文王乎自朝至於日中昃誠和萬民然必朝於王季日三視膳寒暄示萬世人子之法則舜生三十徵庸三十在位五十載著於尙書文王百齡著於禮記繼之者其周之召康公乎卷阿之詩召公所作也曰有馮有翼有孝有德而其致壽之方更有可考見者書召誥篇曰節性惟日其邁節性者節耳目口鼻嗜欲之性孟子所謂君子不謂性也而卷阿篇言俾

爾彌爾性似先公曾矣。曾者精神之凝聚也。彌性者充滿仁義禮智之性。孟子所謂君子不謂命也。古來養性立命之學。以召公爲極。至故輔佐周初文武成康四代。其壽達二百齡。而實本乎孝德。吾特補之曰。孝則壽。易乾卦彖傳言。各正性命。保合太和。吾謂惟太和之氣。洋溢乎宇宙。而後人民得各正其性命。易繫辭傳陳九卦曰。履和而至。又曰。履以和行。和氣充積於家庭社會達之天下。而後一國及世界造於和平大同之域。和氣積則能作善。易傳言積善之家。必餘慶。善氣充滿於一身。一家漸積於一鄉。一邑推之於一國。則如孝經所謂天下和平。災害不生。禍亂不作。反是則爲戾氣。戾氣積則必作孽。書曰。自作孽不可活。自來未有作善而不長久者。亦未有作孽而不消滅者。故曰。和則壽。善則壽。若夫養氣之法。儒家與道家息息相通者也。論語言養氣曰。人之生也。直即孟子所謂以直養而無害也。孟子又言持其志無暴其氣。蓋心與氣相依。心放則氣散。氣散而魂魄漸離矣。老子曰。載魂魄抱一能無離乎。專氣致柔。能嬰兒乎。此養氣至精之法。所謂嬰兒者。言養氣專一。縣縣若存。如嬰兒在胎中。隨慈母之氣以爲呼吸也。或以爲嬰兒出現者。妄也。孟子曰。平旦之氣好惡與人相近。苟得其養。無物不長。又曰。我善養吾浩然之氣。可見養氣先養平旦之氣。俾志定神清。葆而弗失。進而上之。則養浩然之氣。明顧亭林先生言。作文之氣。當與天地清明之氣相接。吾謂非特作文脩養道德。必當如此。浩氣配義與道。非道非義一介不取。予至於直己以正天下。則心氣旁薄於乾坤矣。老子言。虛其心。實其腹。弱其志。強其骨。此養氣至善之法。虛其心者。息念法也。實其腹者。息念而神不外馳。則氣亦反於心。自然下沉於丹田也。一或解實其腹爲飽食者。誤。一老子所謂天法道。道法自然。純任自然。則壽矣。弱其志者。思念寡而不用力也。強其骨者。挺直節骨。行必危。行坐必危。坐不使傾側跛倚也。莊子在宥篇言。無視無聽。抱神以靜。形將自正。必靜必清。毋勞女形。毋搖女精。乃可以長生。目無所見耳無所聞。心無所知。女神將守形。形乃長生。又曰。吾守其一以處其和。故吾守身千二百年。吾形未常衰。云云。始

也形抱神繼也神守形泊於神明不衰則可以長生矣又人間世篇論心齊法曰無聽之以耳而聽之以心無聽之以心而聽之以氣聽止於耳心止於符氣也者虛而待物者也唯道集虛虛者心齊也又云瞻彼閔者虛室生白吉祥止止夫且不止是之謂坐馳虛室者鼻也白者氣也吉祥止止者氣由粗而至於細由細而至於無形也宋朱子作調息箴發明之曰鼻端有白吾其觀之隨時隨處容與徜徉靜極而虛如春沼魚動極而歇如百蟲蟄細細開闢其妙無窮誰其尸之不幸之功雲臥天行非余敢議守一處和千二百歲是朱子亦深通道家學矣至於養氣首戒忿怒曾文正云養身以不惱怒爲本中庸言喜怒哀樂之未發謂之中又言致中和宋李延平先生教人觀未發之中即致和養氣法也（先大父常引此語戒文治之多怒）故曰善養氣者壽

余每歎世人紛紛擾擾奔逐於利心志不定而自促其壽也夫國民心志不定則身家危當道者心志能定毋沉溺奔馳於利欲吾國庶有秀乎爰作此文希冀壽己壽人壽國而即以壽世也

茹經自記

### 窮民歎丙戌

窮民苦 窮民苦 宛轉哀呼向誰訴 更有隱貧高尙人 飢餓不能出門戶 寒風凍雨相逼來 四壁穿漏倒牆堵 惟望仁人大君子 慨解仁囊力補助 多施幾襲衣 卽救幾人凍僵臥 多施幾甌粥 卽救幾家不舉火 此時爲善好機會 萬勿遲延空錯過 善氣充周消劫數 降福子孫無量度 勸施衣施米並設施粥廠文丙戌

深秋已至寒冬卽在目前鄉間之隱貧戶及啼飢號寒不能舉火者恐不免有飢餓凍餒之慘况物價日益騰貴生活程度不知高翔至何地步思之愈覺惻然鄙人常有言天下凡事皆須爲他人着想設身處地自

無人我之隔膜譬如我御重裘享肉食而一念及他人之凍餓以死於本心何忍乎際茲時局生民幾困於水火之中自當亟起以救之唐虞之世一民飢曰吾飢之一民寒曰吾寒之一民有罪曰吾害之禹思天下有溺者由已溺之稷思天下有飢者由已飢之皆自任救民之責吾輩雖無權位亦當時時以救人命爲職志務望大仁人君子發願捐貲或獨立規舉或聯合同志相帥爲施衣施米施粥之會古人云九月授衣目前趕做尙來得及至於設立施粥廠尤爲最大功德其施米者亦須酌給柴火資總之吾多施一衣卽少一凍死之人吾多施一米一粥卽少一餓死之人此時乃爲善大好良機萬不可當面錯過致貽後悔鄙人前作勸善編業已詳言今再簡單言之萬懇大仁人君子迅速進行書云吉人爲善惟日不足論語云見善如不及隨時隨處皆有善因善果切盼切盼至叩至禱

續勸施衣施粥文丁亥

時屆隆冬天氣驟寒茅簷草屋僻巷街頭凍餓倒斃者不可勝數余爲慘然曰吾輩中人之家際茲嚴寒猶飲醴醪服重裘圍火爐居溫室而目擊同胞飢餓以死者比比皆是能無惻然動心乎孟子有言今人乍見孺子將入於井皆有怵惕惻隱之心今茲窮民垂死者載道豈但孺子入井而已況人生以施濟爲最樂應請好善之士多設粥廠若干所並施棉衣若干套或獨力經營或合力調濟倘在飢荒被難之區尤宜分投前往賑濟至於鰥寡孤獨廢疾無告不能舉火者均宜切實援救能救一命卽造一大德於子孫若慮鋪張致受包圍卽隱行其善亦無不可中庸曰天地之大人猶有憾要知人生當彌天地之缺憾際茲時間實係爲善大好機會萬不可當面錯過培植善行必收善果天心佑善不爽毫髮余昔年曾作勸善編已揭斯義茲復簡約言之詩曰俾昌而熒俾壽而臧竊爲諸大善士馨香以祝之

勸居家勿鞭撻小兒說丙戌

余居滬錫兩處鄰家多有鞭撻小兒者甚至拴結桌櫬之上任意毒打兒童呼救絕不之顧若有讎敵者然其小者釀肝鬱之疾其大者罹戕命之凶余不知其何以忍心害理一至於此按字義口含禾爲和凡食五穀者皆當有和氣憶余前年六月居寶界橋茹經堂避暑時一夕傍晚有鄰人父痛撻其子者其子奔逃父追撻之余急高聲呼曰勿撻小兒呼未竟忽聞擲通一聲兒已投水矣鄉人卽赴水救之撈起則氣已絕其父哭之慟旋其母偕親戚等羣至圍哭尤慘余又高聲呼曰此時徒哭無益奉勸同鄉人此後勿鞭撻小兒呼至三遍是夜哭聲達旦余不能成寐嗚呼天下皆人子也爲人子者無論如何惡劣爲父母者皆當正言以勸導之甚者不過怒叱之須知親生之子卽祖宗遺體何爲毒打如此乎抑何忍心之至乎大學引康誥如保赤子申之曰未有學養子而後嫁者也解者或疑此語爲拙不知非拙也孝順出於天性慈愛亦出於天性先儒謂長官撫痛苦垂絕之民如慈母伏其將死之子痛哉斯言乎仁哉斯言乎其何以設法拯救之乎昔清初湯文正公一諱斌字潛庵河南睢州人一撫吾蘇當時稱爲天下第一清官至其學說則曰學者祇須將孟子今人乍見孺子將入於井皆有怵惕惻隱之心二語常存心中卽可上達天德夫天德豈易達而湯公云然者豈不以天生地生生理不泯於人心從而存之則一點良知千古不昧矣易乾卦象傳曰各正性命保合太和能保一心一身一家之和氣推爲一鄉之和氣一國之和氣焉有不能正其性命而馴致於太平者乎孝經孝治章曰天下和平災害不生禍亂不作此之謂也夫天地間和氣與戾氣迭爲消長入其家人其國多和平之氣則家國之興盛可知也入其家人其國多乖戾之氣則國家之消滅可知也吾因人家鞭撻小兒之苦縱論及此以告當世之道德與政治家

演說稿

丁亥九月二十七日南洋大學演講

今日承諸君惠臨商量舊學至爲忻慰鄙人以爲方今最要者氣節二字近撰聯語云人生惟有廉節重世



界須憑氣骨撐若氣骨不立如洪爐之鎔化非我徒也然氣節要有本源在拔本塞源非讀經不足以救國要知經典所載不外興養與教兩大端興養者何救民命是也興教者何正人心是也鄙人常兢兢以此六字爲教育宗旨孟子七篇爲目今善國良藥一言以蔽之曰好善而已矣虞舜聞一善言見一善行若決江河沛然莫禦何等勇往樂正子將爲政孟子贊之曰其爲人也好善又曰好善優於天下善者何養民而已矣教民而已矣余前撰孝經及孟子救世兩編常嘆口瘡舌不憚反復告誡幸勿視老生常談環顧歷屆畢業同學諸君不少奇才異能之士皆屬吾道干城切望以讀經救國一言廣播而推衍之則拯民命正人心之道在是矣或有笑我爲迂者可置之不理也人有不爲也而後可以有爲禮記中儒行一篇實與斯旨隱相符合務宜熟讀蓋人必矢志廉潔俾良知不昧而後能有所展布故居今之世提倡明代王陽明先生之學尤爲當務之急諸君有志研究則處爲名儒出膺政治恢乎有餘裕矣鄙人所撰陽明學術發微以爲致良知之學可以救世知行合一之宗旨可以救國豪傑之士其亦有志於此乎夫菽粟布帛古代發明何嘗不陳舊而數千年來民生賴以飽煖者樂利而無窮蓋其用雖殊而其體不變可以三隅反矣吾輩都是國學中人須從根本着想方論到建設不然方寸之間見利忘義本心已昏昧豈能辦天下之大事乎宋蘇子有言辦天下之大事者立天下之大節者也願與諸君共勉之

氣節之說已如上所述請再暢發爲善之宗旨顏淵曰舜何人也予何人也有爲者亦若是所爲何事爲善而已矣然則人生當世爲善而已矣孟子言大舜有大焉善與人同此卽周易大有同人二卦義也然則何以倒言之按序卦傳與人同者物必歸焉故受之以大有有大者不可以盈故受之以謙有大而能謙必豫故受之以豫（豫樂也）孟子下文卽言舍己從人樂取於人以爲善舍己必先克己無人己之隔閡則惟善是從矣近世人士不能適道者患在有己而無人耳下文又曰取諸人以爲善是與人爲善者也故君子莫

茹經堂文集六編目錄

卷二 經說類

周易天命學乙酉

周易保民學一乙酉

周易保民學二乙酉

周易積善學戊子



# 茹經堂文集六編卷二

太倉唐文治蔚芝著

## 經說類

### 周易天命學乙四

居今世而論天命概斥之爲迷信矣庸人惑於其說於是一心不得其所而一身一家一國日卽於阽危悲夫吾請與之讀易孔子言五十以學易又言五十而知天命蓋易知天命之書也而實則心學也敬心卽以敬天也曷言乎爾先徵諸乾坤二卦大哉乾元至哉坤元衆善之長各正性命皆本心之德也乾元亨利貞天道流行不已君子法天以自強不息故文言傳曰先天而天弗違後天而奉天時聖人造命先天者也賢人立命後天者也先天者先知而先覺敬天之出於自然者也後天者雖知覺稍後能進於先天者也敬天之出於勉勵者也皆心學也坤之道敬以直內直者何直其內心也正位居體非靜以驗天心乎其他諸卦多有言天命者更推論之

泰否二卦爲世運之樞紐泰九三言无平不陂无往不復象曰天地際也謂天人相與之際深可畏也否九四有命无咎疇離祉朱子解命爲天命項氏安世周易玩辭謂泰九三於无咎之下言有禍否九四於无咎之下言疇離祉者二爻當天命之變正君子補過之時其說極精繫辭下傳曰君子安而不忘危存而不忘亡治而不忘亂是以身安而國家可保也引本卦五爻其亡其亡繫於苞桑惟常以亡爲慮故能兢兢業業傾否而不亡也是皆敬天命之效也

又微之大有卦大象傳曰君子以遏惡揚善順天休命楊氏萬里誠齋易傳謂天討有罪吾遏之以天天命

有德吾揚之以天所謂天工人代也敬天命之至也故上爻曰自天佑之吉无不利萬事芸芸難出而不窮智者辨所爲之善惡而已虞舜大智在隱惡揚善孟子贊之曰大舜有大焉善與人同舍己從人樂取於人以爲善是卽有同人二卦之義近曾文正誥誠門人以取人爲善與人爲善作爲程課每日紀之於冊隨時自省所謂順天休命者也

又微之无妄卦彖傳曰大亨以正天之命也其匪正有眚不利有攸往天命不祐行矣哉蓋无妄與妄在一念轉移之間人性本善其初念多出於正一轉念而妄生矣如二爻之不耕而欲獲不菑而欲畲貪念也貪者天之所大惡天命不祐無往而可矣故凡人求往吉必先嚴絕其貪念

又微之革鼎二卦彖傳曰革而當其悔乃亡天地革而四時成湯武革命順乎天而應乎人革之時大矣哉程傳謂天下之事革之不得其道則反致弊害故革有悔之道惟革之至當則新舊之悔皆亡故惟湯武而後可以言革命詩長發篇曰帝命不違聖敬日躋武王之受丹書曰敬勝怠者吉皆敬天之學也鼎之大象傳曰君子以正位凝命定天命也詩所謂天保定爾亦孔之固韓詩外傳謂定仁義禮智信之德蓋卽敬天命之性也

又微之姤卦姤五爻曰以杞包瓜含章有隕自天象曰有隕自天志不舍命也其當文王與紂之事邪蓋杞木高而能庇蔭瓜田謂文王之德有隕自天謂文王囚羑里事也志不舍命當與臨卦二爻象傳未順命參看未順命者謂周已受天命而不違順之也不舍命者謂殷天命已絕而猶不舍之也聖人常欲以義理勝氣數無非救民於水火之中而已矣

以上易之言天命學皆以敬天爲宗旨試推證諸羣經堯舜之世後世稱爲大同堯則欽若昊天舜則勅天之命欽與勅皆敬也禹曰安汝止以昭受上帝天其申命用休安汝止卽敬也申命用休卽易之順天休命

也傳之於湯詩長發篇曰湯降不遲聖敬日躋又曰上帝是祇帝命式於九國敬天而上躋天德乃受帝命式於九國也敬之爲功大矣哉傳之文王詩大明篇曰有命自天命此文王維此文王小心翼翼昭事上帝聿懷多福美哉八百載之基業皆緝熙敬止純一不已之精神所貫澈也又傳之周公召公書召誥篇曰若生子罔不在厥初生自貽哲命哲命必謹之於生初者本經蒙卦所謂蒙以養正也有夏有殷服天命惟有歷年惟不敬厥德乃早墜厥命敬德者敬天命也故終之曰祈天永命此其垂戒不獨在成王且在萬世也周公昊天成命之詩曰成王不敢康夙夜基命宥密於緝熙單厥心單者殫之省文言敬其心也故曰肆其靖之敬之詩曰天惟顯思命不易哉陟降厥士日鑒在茲士者事也敬其心以敬其事敬天命之學也又傳之孔子曰君子畏天命小人不知天命而不畏也孟子傳其學達諸國曰畏天者保其國引詩畏天之威於時保之綜覽史書未有不畏天命而能保其國者也蕩之詩曰匪上帝不時殷不用舊雖無老成人尙有典刑曾是莫聽大命以傾又曰殷鑒不遠在夏后之世嗚呼侮老成廢典刑而傾大命豈特殷鑒而已哉蓋萬世之鑒云

### 周易保民學一乙四

禮記曰教也者民之寒暑也教不時則傷世故凡講經者必按時以立論非揣摹時尙也羣經之義靡所不包歷千古而常新講經之士應審察時事之最要者於經書中切實發揮之抉其心而執其權補其偏而救其弊今日民生困苦極矣講經者當以救民命爲宗旨而保民之義實始於周易吾特發明其義世之讀易者其亦有視民如傷之感乎

易義乾陽爲君坤陰爲民非特天尊地卑之義也蓋有統屬之道秩絃於是乎定繫辭傳曰陽卦多陰陰卦多陽其故何也陽卦奇陰卦耦

謂如震坎艮陽卦也而其卦體陽爻僅一陽爻則有二其德行何也陽一君而

二民君子之道也陰二君而一民小人之道也陽謂父君 陰謂子君說者謂一奇爲陽卦者是君之權出於一君爲主也一耦爲陰卦者是君之權出於二反若民爲主也疏釋極爲分明愚嘗謂後世人士多慕高官厚祿皆有欲求爲君之心卽不得爲君亦各懷專制之意是故小人之道日長君子之道日消世焉得而不亂哉爰引諸卦剴切陳之

屯初爻象傳曰以貴下賤大得民也按此平等之說也繫辭傳曰卑高以陳貴賤位矣貴賤位而後秩序正然貴之於賤者當常存平等之心而後可以得民若傲慢自恃動輒予智自雄以爲人莫己若訑訑之聲音顏色距人於千里之外則讒諂面諛之人日至國不可得而治矣況本卦當濟屯之時尤宜以謙恭待下爲主觀經文不僅曰得民而曰大得民蓋君與民爲一體衆志成城矣謙卦曰勞謙君子萬民服也又曰君子以稱物平施平施者平等也惟賤者對於貴者則不宜責以平等致啓陵上之漸耳

師大象傳曰地中有水師君子以容民畜衆按此江海之量也局量褊淺者不可以治民易大衆傳例皆以內外卦對勘爲義容民地象也畜衆水象也天下之相附相親者莫如地之與水水地爲比地水爲師故在上者之與民衆最爲切近先儒謂田以民分兵以賦出故當無事之時必制田里教樹畜使比閭族黨州鄉之民無不各得其養民既有養則所謂仇兩卒旅軍師之衆以爲他日折衝禦侮之用者皆畜於此可見寓兵於農之法千古不易教練要在平時也蠱大象傳曰山下有風蠱君子以振民育德按振有二義一爲振濟一爲振作二者相爲表裏蠱當竄敗之時風爲山阻民志迷惑必先有以振濟之次有以振作之而後民可離去蠱疾善治民者宜察其消息也故必自育其德而後能育民之德蒙卦傳曰君子以果行育德臨大象曰澤上有地臨君子以教思元窮容保民无疆按教必曰思非思無以爲教也保必曰容非容無以爲保也无窮者兌澤之深无疆者坤德之廣惟教思无窮而後能容保民无疆說者謂教思指學校而言容保民

指閭閻而言似過泥書無逸篇曰古之人胥保惠胥教誨是胥保之中亦寓教誨之道是故君子之所以教民者要在開民之智序卦傳曰臨者大也若自怙其智卽不得謂大矣孟子之論伊尹曰先知覺後知先覺覺後覺有志之士當先知先覺先天下而任教養之責

觀大象傳曰風行地上觀先王以省方觀民設教按文王之教江漢汝濱皆被其化故稱先王周禮大師陳詩以觀民風蓋國風之詩所自始也抑又考殷人稱民爲生書盤庚篇所謂往哉生生生自庸是也孟子曰得天下有道得其民斯得天下矣得其民有道得其心斯得民矣觀民者察民之心也五爻觀我生象曰觀我生觀民也謂觀周之民也上爻觀其生象曰觀其生志未平也謂觀殷之頑民其志猶蠢然欲動也皆言殷之末世周之盛德也

#### 周易保民學二乙四

剝上爻君子得與小人剝廬象曰君子得與民所載也小人剝廬終不可用也按輿者自下載上民載君也夏之少康漢之光武皆以得民心而興若處剝極之時又復傲很明德以亂天常則民心離叛將無容身之地矣大象傳曰上以厚下安宅上不安其下則下必剝其上所謂水能載舟亦能覆舟也

頤象傳曰頤貞吉養正則吉也天地養萬物聖人養賢以及萬民頤之時大矣哉按天地之道在養育萬物養育萬物之道正而已矣聖人作養人才與之共天位食天祿俾施澤於天下養賢以及萬民養賢卽所以養萬民也夫天地之中品物之繁非養則不生孟子曰以善養人然後能服天下文王制田里教樹畜使民各得所養豈不大哉孟子曰堯舜之仁不徧愛人急親賢也堯舜豈不愛人哉親賢正所以徧愛人也

益上爻莫益之或擊之立心勿恆凶繫辭下傳曰君子安其身而後動異其心而後語定其交而後求君子脩此三者故全也危以動則民不與也懼以語則民不應也无交而求則民不與也莫之與則傷之者至矣



易曰莫益之或擊之立心勿恆凶按安其身易其心乃修身正心之事定其交乃與國人交之事危以動者若齊宣三佞人滿前而猶欲辟土地朝秦楚也懼以語者非己心有所戒懼乃威懼其民而壓迫之也无交而求謂求益不已惟搜括民財也莫益之而或擊之則身家性命與之俱糜矣立心勿恆者朝令夕更機械變詐欺罔其民則凶于而國矣是故欲全其身必愛民之生惜民之命民之性命即己之性命也

姤四爻包无魚起凶象曰无魚之凶遠民也按魚民衆也包无魚者欲牢籠民而民遠去也孟子齊宣王論燕國之事曰燕虐其民王往而征之民以爲將拯己於水火之中也如水益深如火益熱亦運而已矣運者轉而之他國也是爲包无魚之象大學之道首在親民於傳有之民可近不可下越句踐之報吳亦常親近其民蓋惟近民而後能知民之疾苦察民之情僞而默喻民心之向背也後世堂高廉遠與民隔膜臨急難之時欲民之盡心力難矣哉

井大象傳曰木上有水井君子以勞民勸相按舊時解勞民者如巽風之布號令勸相者如次水之相灌輸似相字當作平聲讀本卦彖辭曰往來井井彖傳曰井養而不窮也繫辭傳曰井居其所而遷蓋井以養人而民用之多少各得其分量而止故傳又曰井以辨義義者各適其宜也放勳曰勞之來之使自得之又從而振德之正合本卦之象振德者即疊卦傳所謂振民育德也是故君子之爲治也提倡之使勤勞其事而不加以干涉因民之所利利之而不庸

繫辭下傳黃帝堯舜氏作通其變使民不倦神而化之使民宜之易窮則變變則通通則久是以自天祐之吉無不利按窮變通久乃周易消息之大義古今中外政治之綱維也禮記王制篇曰中國戎夷五方之民皆有性也不可推移脩其教不易其俗齊其政不易其宜實與此經相表裏化而裁之存乎變往來不窮謂之通至誠無息則久矣民生異俗衣冠異制言語異音文字異形器用異宜各有攸殊必審察其所宜而變

卷二 經說類

通之專守舊者非也專喜新者亦非也因乎時而已矣堯舜而後厥惟孔子之立道綏勸孟子所謂過化存神爲得乾坤易簡之道本經言政治之卦上經爲否泰下經爲損益損益得其宜則治不得其宜則亂益之家傳曰損上益下民說无疆後世之行政者欲知窮變通久之義毋損下以益上斯可矣

至推論保民之道以孟子爲尤詳攷梁惠王篇自論與民偕樂民欲偕亡始以下論施仁政於民民字幾於更僕難數而其尤精要者在言保民而王莫之能禦推及於不忍之心蓋惟不忍於其民而後能保民以保國卽易所謂身安而國家可保也其下言與民同樂推及於樂以天下憂以天下易所謂吉凶與民同患也離婁篇多言政治其首章曰聖人既竭心思焉繼之以不忍人之政而仁覆天下嗚呼何其愛民之深也愛民乃可以救國後世求治者吾請與之研保民學

周易積善學序

古今中外國家爲治之道善氣與惡氣消長而已善氣盛則存且興惡氣盛則廢且亡理有必然不待智者而決孟子當戰國之世目擊生民之顛沛流離慨然嘆曰孳孳爲善者舜之徒又曰仁義忠信樂善不倦此天爵也夫善不善之念非由外鑠我也其幾藏於一心而根於所積君子之道慎於所積而已願積善之說權輿於周易餘慶餘殃垂訓萬世嗚呼可懼哉近世民生憔悴已極有志者扼腕興嘆不知此正爲善救民不可失之機會急起直追猶可以爲善國失此不圖抑將不可收拾矣爰發明周易積善之義著之於篇以諗學者

乾卦文言傳元者善之長也又曰君子體仁足以長人

按在天曰元亨利貞在人曰仁義禮智元者善之長凡人平旦意念之始無有不善所謂良知之發性善之明徵也故前明王陽明先生之教曰致良知曰體仁足以長人可見體之於心善念有所虧缺者

即不足以爲君德不足以長人

坤卦文言傳曰積善之家必有余慶積不善之家必有余殃

按易爲教人積善之書天道無私善慶惡殃以所感之氣而致曰必有者言確定不易之理也而世人以爲迷信氣數誤矣數必由理而推先大夫常訓文治曰三十年爲一世惟積善可以長久

大有卦彖傳曰君子以遏惡揚善順天休命

按虞舜之大智不過隱惡而揚善善者天之所命也顏子曰舜何人也予何人也有爲者亦若是言爲善也文治學易最喜讀大有卦其二爻曰大車以載象傳曰積中不败喻積善之多也其上爻曰自天祐之吉无不利繫辭傳三引此爻可見積善者天祐之矣

繫辭傳曰一陰一陽之謂道繼之者善也成之者性也

按宋儒解此節謂繼善在成性之先後人斥其空虛不知陰陽善氣也天地間綿延不絕者無非善氣人體而成之則爲性說卦傳曰和順於道德而理於義窮理盡性乃所以爲道德而道德必基於和順繫辭傳曰善不積不足以成名惡不積不足以滅身小人以小善爲无益而弗爲也以小惡爲无傷而弗去也故惡積而不可掩罪大而不可解易曰何校滅耳凶

按聖人言君子居其室出其言善則千里之外應之出其言不善則千里之外違之言行君子之樞機樞機之發榮辱之主也言行君子之所以動天地也可不慎乎聖人勸善如此而善幾稍縱即逝故論語曰見善如不及先儒嘗集聯語云言行動天地孝弟通神明後學可不勉哉

茹經堂文集六編目錄

卷三 贈序壽序類 書類

送周予同先生赴台灣序 乙酉

贈蔡君伯崙序 丙戌

贈吳生常燕序 丁亥

豫縣杭銘渠先生七十壽序 乙酉

無錫楊味雲先生八十壽序

武進謝桂堂先生八十壽序 丁亥

寶山王鯉庭先生八十壽序 乙酉

慈谿秦潤卿先生七十壽序 丙戌

定海劉鴻生先生六十壽序 丁亥

無錫宗弟婦華太夫人八十壽序 丁亥

茹經堂文集六編

卷三 目錄

# 茹經堂文集六編卷三

## 贈序壽序類 書類

太倉唐文治蔚芝著

送周予同先生赴台灣序乙酉

台灣地處閩省之東相隔一水有唇齒相依之勢爲軍事政治陬區從前士大夫議改設行省而行政卒未收指臂之效清光緒中葉我師敗於日本合肥李相國主持和議訂約馬關遂與朝鮮先後割讓維時清議咸非之余亦爲悲憤不怡者累數月蓋相國雖有不得已之苦衷然一敗再敗中原震撼固不得辭其咎也自是厥後台地淪陷者垂六十年乙酉歲我國師戰勝河山復舊朝頒新政士溫故業執友浙江瑞安周予同先生奉政府命派赴台灣任文史專科學校校長余追思往事忻喜特甚於予同先生之行也序以送之曰閩省學派倡自紫陽訖於前清之初李文貞公光地闡明性理大扇宗風康熙時欽定諸經傳說彙纂與折中義疏等皆出其手擬臺進獻之於是文學遞傳一時春誦夏弦達於閭巷儒林碩彥雍容揄揚揆芬攜藻方領矩步罔有踰越範圍者可謂盛矣洎乎近世士或溺於卑淺之說俚俗庸庸不克深造四書羣經遂束之高閣而不讀世道淪胥率由於此又何衰也非有人焉盡力以振興之斯文掃地無餘不知伊於胡底矣予同先生博學多聞敦善不怠恂恂乎君子人也曩歲在國學專修學校教授諸生宗旨登出於純正與余心心相印而其識見之卓越羣倫廣博無津涯遠出余上宋張橫渠先生有言爲天地立心爲生民立命爲往聖繼絕學爲萬世開太平蓋吾人講學固以後世爲性以百姓爲命非拘墟於一時也予同先生此行任講學之職實負傳道之功古語曰莫爲之前雖美弗彰莫爲之後雖美弗傳閩學淵源失傳久矣吾常謂

欲淑人心必明心理而欲明性理非昌明閩學不爲功理學明則人心善而國運以盛理學晦則人心昧而國運亦衰徵諸史書毫髮不爽非虛言也先生行矣異時聲教宏敷藝林輿誦台地文化行將與吾蘇諸省相頡頏口碑所載咸曰此周先生開山之力也其盛矣夫其吾校之榮也夫其邦國之光也夫是行也何生以聰相隨往何生品詣誠樸爲吾門高弟得從此名師昕夕受教必有精進而無疆者更當拭目以俟之

贈蔡君伯崙序丙戌

蔡君伯崙台灣人也僑居海上有年有志國學時詢余讀書門徑丙戌孟夏來告曰吾離台若干載矣親戚朋友音問遼隔今將歸探詢請先生一言以爲別余維台灣本隸中國版圖甲午之役唐維卿先生景崧將以台灣獨立爲日本兵所敗迫和議告成當事者遂以其地割讓於日誠大可痛心事也邇者國軍告捷還我河山而蔡君當滬地陷落時絕不與日人相往還其氣節屹然可貴矣而於斯時反台重覩太平之象其忻喜愉快爲何如也惟余更有進者欲興中國非正人心不爲功而欲正人心非讀經籍不爲功台地風氣初開驟語以羣經要點恐程度或有未逮則惟有以孝經論孟啓發其良知孝經者六藝之綱領也論語者修己治人之根柢也孟子當戰國擾攘之時盱衡世變提倡仁義七篇之書非但可以正邦家抑且可以救世界台民歸嚮中土之心久而彌篤能以此三經爲先路之導由此而進求之則通經救國之效胥寓於是矣蔡君勉乎哉豪傑之士當開通風氣不當隨風氣爲轉移然則啓台地之民智養台地之民德其責任當有攸屬矣蔡君勉乎哉

贈吳生常燕序丁亥

當有明正德嘉靖之時政治萎靡不振王文成公陽明起而振之而明祚於以綿延當時清咸豐同治之交政治窳敗成風曾文正公濂生出而挽之而清社於以重光此非古所謂三不朽者耶惟文正有言不朽之

業立功者乘時會而興惟立德立言則修之在己不隨世運爲轉移也方今之世世界晦蒙亦已極矣民生憔悴亦已甚矣豈無人起而振之哉余曾撰聯勉後學云人生惟有廉節重世界須憑氣骨撐有氣骨而文章隨之文成文正兩公豈非其選哉文正論文推崇桐城派特至觀其所爲歐陽生文集序可見宗旨所在其述桐城姚先生之言曰必義理爲質而後文有所附考據有所歸至哉言乎蓋洞明乎性理之奧則文章鍊意鍊局鍊氣鍊詞之法不煩言而解矣及門合肥吳生常燕姚氏之姻親篤守桐城派精進不已自吳擘甫先生而後傳人其在茲乎抑余所嘉獎吳生者尤在於家庭之孝行孝經云夫孝德之本也教之所由生也近陳蘭浦先生謂學字从孝教字亦从孝吾人人生天地間所以爲學爲教者孝而已矣吳生天性純孝當合肥于戈擾攘之秋間關跋涉迎其母太夫人出險來滬精誠之至可謂孝也已孟子論良知之學曰親親仁也敬長義也無他達之天下也吳生能本斯旨秉推恩以保四海之訓與同志同學研究孝經因實愛其身推及於不傷民生身體髮膚良知充浹於宇宙則吾中國庶有豸乎殷元聖自任天下之重言非異人任也余近又撰聯云老吾老及人老幼吾幼及人幼天下溺由己溺天下飢由己飢文成文正前型不遠吳生其勉之哉

歙縣杭銘渠先生七十壽序乙酉

小戴禮記大學篇曰君子不出家而成教於國又曰一家仁一國興仁一家讓一國興讓古之教育家所以大過人者善推其所爲而已余常懸斯詣求之於同志之士蓋憂憂乎不易觀柔兆奄茂之歲且月四日忻逢歙縣銘渠杭先生七十攬揆良辰哲嗣立武立慈兩君承歡預祝將具醴醪酌酒以甘之鏗笙簧絲竹以樂之而立慈畢業於國學專修學校爲余及門弟子慇懃來徵壽言余雖弁陋誼不獲辭且立武君現任教育部長尤望其推家教以爲國教也謹按先生字銘渠安徽歙縣籍天性誠篤幼時里中豪猾頗橫恣一厥



考某某公命——先生習舉子業期於奮志天衢振作風尚先生奉命惟謹晝夜攻讀不遑旋丁內艱——先生奉養兩代孀慈溫靖定省必誠必敬力排諸梗阻三試三冠軍遂補博士弟子踰年食廩饋未幾科舉廢——先生益貧乏以硯田所入供白華潔養之資辛亥政變後教育事業寔廢——先生迺鳩合同志創設學校惟以親老恐違先聖遠遊之戒爰上侍讀堂下培蘭玉奈屢空極窘嘗以一荳腐乾判四分以佐饌其堅苦卓絕有如此者豈意教育孽孽不倦嘗編史地等歌訣挈子女入校時緣道歌吟或笑其迂弗顧也嘗謂立武曰昔曾文正善果種於前清末造諸賢今余之善果當種於汝身矣又設通俗夜校約各教員輪值督課或遇夜黑風狂時方食遙聞鐘聲卽吐鋪起曰吾恐教員不能到校致失社會信仰且言且急趨以是得胃病祿介江淮之間用武地也民國十六年前先生方辦教育兼長紅十字會分會洎國軍北伐因清黨退金陵直魯軍將先生家肆以洗劫以其屋爲馬廐時先生方聯合蘇皖士紳辦皖北難民收容所不暇爲身家計也迨魯軍敗竄伏莽滋興閭閻不得安堵先生奔走乞師不遑休憩復以立武等君留學英倫轉而留美責斧行將不繼乃摒擋稱貸挾貲間道走南京匯以濟用歸而胃疾增劇時局元黃日寇內憂驚震不測鐵鳥盤空先生慨然曰吾不可先去以爲民望時金陵已陷不克西行伏戎林莽時遭洗劫寇復焚其寓廬金君延生先生之令坦也時長安徽省立中學亦以徙校較遲轉輾流離率眷顛沛避難出入饑饉之境接茹菽藿之食其辛苦有難以言罄者天佑善人民國廿七年始脫險至滬雖此離幸免而簞瓢屢空餘淪接濟皆以道遠中斷先生曰吾處境雖困而志不可屈勞筋骨餓體膚此其時矣爰偕女某某往返二十里之周家橋負米以爲炊某某嘗爭取老父所負米獨肩之先生不欲分其半力負以行途中口占詩句云自辛年來腰脚健猶能負米養兒孫遇相識則欣然告之以爲笑樂又曰素貧賤行乎貧賤吾際此環境富且貴焉恥也疏食負米樂道安命是吾之天職也平居恆太息自恨不能效健兒報國輒曰此生誤我我誤此生可見

先生抱負之不凡矣。偶聞人間爭名奪利事，愀然曰：身且非吾有，何有於名利乎？其淡泊明志，又有如此者。性好讀書，手不釋卷，口不絕吟。所著詩文，不自料簡，隨手輒散。去每日出門散步，一小時呼吸空氣，歷寒暑以爲常。淮南子曰：食氣者神明而壽，豈不信與？近年子立武貴榮膺教育部長，先生勉以謙挹，慎勤昌明文化，用是立武立慈兩君均能先意承志。玉昆金友，郁郁彬彬，極家庭之樂事矣。而余則更有進焉者。回憶三十年前，余遊歷歐美各邦，雖行政設施不同，靡不兢兢焉自保其國粹，以爲立國之本。又嘗聞先哲嚴幼陵先生與英使朱爾典晤，譚以吾國險象環生，秋歎太息。朱謂中國有寶書發而讀之，躬行而實踐之，何憂邦之杌隕？惟歐洲倘有戰事，恐一發難收耳。嚴詢以何謂寶書，朱云：孔孟諸經是矣。既而歐戰果興，其言良驗。然則振興國粹，非以讀經爲先務之急乎？孝經爲羣經鈐轄，論語載修己治人之方，孟子生戰國時，提倡仁義以救人心，曰：未有仁而遺其親孝也，未有義而後其君忠也。先生膠庠舊碩學，通儒而立武部長，提倡經術，發一綫資往者，枉顧寓廬，以病體有失，倒屣未獲，面陳然審時度勢，非讀經不能救國立武部長提倡經術，發一綫之曙光，收宏通之效果。儒林之彥，僉鼓舞奮興，頌曰：此太翁本家教，以爲國教也。用敢道其所期，且詠葩經以爲頌。曰：眉壽保魯，復周公之宇；俾昌而熾，俾壽而臧。躋彼公堂，稱彼兕觥。萬壽無疆，方今復宇之時。正當先生稱慶之日，普天同樂，令聞令望，南山臺萊中邦砥柱，豈弟君子，引翼維持。先生聞之，其亦適然晉一觴乎？爰序而紀之，以爲百歲期頤之預祝焉。

無錫楊味雲先生八十壽序

歲在強圉大淵獻臘月吉日，忻逢吾執友味雲楊先生八秩。攬揆良辰，廣勸廣豐，廣利公司介同鄉友人顧君康伯來徵文於時。春酒初熟，祥風斯扇，戚儕僚友踴躍濟濟，羣萃華堂，吉語駢蕃，同介壽祉。爰有執爵而進者曰：先生自幼天賦英邁，萬卷胸羅，發爲瑰琦炳蔚，操不律灑灑洋洋，數千百言倚馬立就。擷羣經之奧

奕雄司馬之高文於學既無不關於文則諸體咸備歷金山登玉田諸賢類首莫敢與抗讀雲在山房類稿諸鉅著豈非文章家之淵藪乎願獻一觴以爲祝又有執爵而進者曰先生提倡棉業擘畫經營衣被羣黎罔有涯涘其言曰欲北方之民無飢莫如興農田欲北方之民無寒莫如興紡織於是偕周緝之總長創設華新紗廠於津市繼復高掌遠躡推賢退方獨力推設唐山衛輝等處數稔之間風起雲湧天津紡織廠成立者六家而晉豫遼魯風聲所播並時奮興於是日光一色雲錦七襄惠逮乎窮簷恩周乎挾纊僉爾而稱曰此皆無錫楊公之賜也而先生退然謙抑絕不居功此非盛德之至者乎願再獻一觴以爲祝於是又有執爵而進者曰人皆知先生爲經濟家實業家而不知其政績之卓著也先生殫精經世之學舉凡田賦鹽漕幣制農田水利諸大政靡不鉤稽攷覈握其綱維實手錄數十萬言哀然成帙出而施諸實政初由內閣中書攷取商部載育周尙書倚畀特隆凡部中宏文典冊悉出先生手定旋隨使節赴泰東西各國暨南洋羣島參贊機宜象寄譯鞅人懷其德比歸擢度支部參議方是時當軸者銳意變法廓清積弊遂任先生爲清理財政總辦政體改變後任長蘆鹽運使山東財政應旋內調爲財政部次長行政登秉大公不涉苛細裁減各行省外銷款凡法所不當取者一切禁斷之而於疆吏鹽事歲入養廉豐其祿或疑其歧視先生曰既謂之養廉矣必使所入足以養而後可責以廉議遽定河工經費歲出其鉅有議盡罷之者先生持不可曰國家奈何吝此數十萬金不爲末弁微員留生計耶議者以爲名論此非政治之要乎願再獻一觴以爲祝於是余迺翕然執爵而晉頌曰義經大義消息因時中庸準易亦以溥博時出爲旨先生數歷中外所以因應咸宜者普觀乎盈虛消長之樞機也至於經綸萬彙綱紀四方惟在時措得宜而已余與同官農工商部時察其安止從容德性堅定不競不祿不震不動知其深造自得涵養有素後聞其服官運使財部時進退取與事上洩下舉以曾文正爲法膏考文公與李中甫先生書謂修己治人之道當以取人爲善與

人爲善兩事每日書之於冊自省所行善果若何其赴善言善行宜沛然莫之能禦邇者鴻噉於野魚潛於淵屋烏無止舍之瞻鋌鹿有走險之象萬姓睽睽望治奚翅飢渴先生悲憫素蘊體用兼賅雖管修葺管社山莊有歸隱奉先之志而余深望其濟世救民出膺霖雨蒼生之寄凡在同志翕然雲從閣澤徧乎寰區黎庶登於衽席而其子姓振振俾昌而熾式穀受祿罄無不宜豈不懿歟衆皆曰懋哉懋哉退而敘紀其說以爲爾日舉觴之侑焉

武進謝桂堂先生八十壽序丁亥

自六朝譜牒之學盛宋元以來競尙家世舉凡一姓之勳勞閱閎道學文章靡不詳焉詩崧高篇曰于邑于謝南國是式是爲謝氏錫土姓之權輿迨至南宋時有大儒出諱良佐字顯道後世稱程門四先生之一余讀宋史道學傳輒嚮往不置其所學先在去一矜字伊川先生亟獎許之以爲能切問近思召對時因徽宗意志不誠出爲監西京竹木場事蓋其學問深邃氣節高尚若此歲躔丁亥某月之吉忻逢武進桂堂謝先生暨德配黃夫人八秩雙壽良辰其哲嗣彬仁命其子紹芳紹佐來請曰吾祖暨祖母眉壽燕喜吾父將率觴稱慶而吾祖戒以勿效世俗所爲未敢鋪張欲求先生爲文以彰榮寵紹芳紹佐余及門弟子也余因其爲顯道先生後裔爰詢喬遷武進家世益歎謝氏之源遠流長先生伉儷之康彊大耋爲有餘也按宋南渡後謝氏始遷祖彥成公來尉武進卜居邑西謝家莊十四傳至振瀾公移居邑東橫林鎮遂爲橫林人六世祖智昆公五世祖母金太夫人皆享上壽抱曾孫祖盈瀾公享壽八十有五考榮卓公享壽七十有七均保篤厚長者有四世同堂之盛今先生亦復孫曾繞膝奕世相承故昆陵錢名山先生嘗爲稱頌曰七代以來曾祖曾孫同堂者五世人間壽考之祥子孫之樂未有如謝氏者先生篤親誼敦故舊持己節儉待人和煦未嘗有疾言遽色介弟錫堂先生年近古稀相對怡怡友于彌擘茲當杖朝之年而步履與強艾時無異夫

人秉性恬澹不尚聲華侍上以謹御下以寬處鄉鄰妯娌姑嫂間雍雍和睦蓬豆靜嘉與先生尤相敬如賓焉竊嘗以先生之德行與顯道先生相衡先生之涵養中和即顯道先生不矜不伐之純詣也然諾不欺即顯道先生出居竹木場之節槩也其善承先澤篤守彝訓洵無愧矣且夫家庭之瑞和氣而已先生伉儷白首齊眉冲和洋溢非周易所謂保合太和者歟宜聖云積善之家必餘慶又云善不積不足以成名先生暨夫人閨門積善充己飢己溺之懷宏立人達人之願其遐齡綬福庸有艾歟矧居今之世實爲善大好時機余於是敍先生之世澤與其好德之善以爲百歲期頤之預祝且爲彬仁賀爲紹芳紹佐等昆季勉焉爰集葩經以爲頌曰南山有臺北山有萊復我邦族予還歸哉迺廣載歌曰魯侯燕喜令妻壽母純嘏而常蓂祿而康俾爾熾而昌俾爾壽而臧子孫繩繩萬壽无疆

寶山王鯉庭先生八十壽序乙酉

歲隲乙酉五月二十七日忻逢王鯉庭先生暨德配唐夫人八秩雙壽良辰其哲嗣德昌德盛德慶將勾合親朋僚友陳設酒醴笙簧以極一日之樂先生曰止茲者蚩霧橫空戈鋌滿地鴻噉於野魚潛淵仁人君子蒿目時艱方奔走救濟之不暇其何敢稱慶乎德昌不獲已謀諸乃壻孫君壽熙徵序於余以資光寵余維寶山羅陽邨爲余太屬同鄉而壽熙又余及門高弟也誼不獲辭爰詳詢先生之事實壽熙之言曰熙自館甥王氏以來略稔其世系太岳炳揚先生設藥肆爲業宅心仁厚好善不倦慎交遊喜施與鄉人之貧困者不取值輒給以良藥當庚申之變有匪徒煽亂稱小刀會披猖日甚先生爲出謀發慮密定民匪標記隨邑父老殲厥渠魁城賴以全遂以軍功得褒獎五品銜事詳邑志篤生外舅鯉庭先生常以家庭積善爲訓外舅自幼事親孝敬唯諾無違維數奇五應院試不獲選僅得補廩生人咸惜之而外舅纖毫介於懷爲童子師兼岐黃術習女科技業從事所入豐吝弗較也嘗偕季弟合資設肆鬻藥顏曰生生堂取利濟同胞

之意越五載不幸抱季弟令原之痛藥肆途輟業而外舅泊如也居恆嗜飲舉數觥不醉願愛惜物力自奉  
彌儉雅好吟詠晚歲結詩酒會名曰小羅浮社羅陽有古剎植老梅數十本外舅與諸吟侶嘯詠其間可謂  
雅人勝致矣壽熙所述如此余維老氏道德經有言天法道道法自然君循性而行無入而不自得非所謂  
任天而動者耶非所謂動合自然者耶願先生雖率真而行不問生產而實勤於職分中年嘗襄辦寶山崑  
山兩縣清丈田地事宜孜孜罔懈克著勞勩俾此疆爾界無侵蝕之虞頗見稱於時嘗任高郵厘局事目睹  
浮收不顧同流合污未一月亟解職可謂自潔其身矣德配唐夫人家世業商年某某歲來歸鯉庭先生夫  
人謙敬和藹待人以厚御下以誠某某歲室家不造忽罹火災然而鯉庭先生秉心高尚平居不屑屑理瑣  
事以夫人鍼黹所入藉佐饔飧穿針洞窠十指爲流血教育子女費時伙益其乏至向平願遂慈愛諸婦無  
異所生詩曰何有何無黽勉求之禮曰子婦有勤勞之事甯數休之夫人其嫻詩禮之教矣宜其家庭昌熾  
未有艾也夫琴瑟偕老至八十而齊眉協慶豈非人間世所難能者乎由是八十以至九十上躋期頤之壽  
可預祝也先生謨育滋蕃長子德昌績學懋行畢業於龍門師範學校旋任縣視學教育局長令聞令望洵  
無愧色其餘諸子亦克世其家余因乃壻壽熙之請爰敘述以貽之以爲稱觴之侑焉

慈谿秦潤卿先生七十壽序丙戌

粵維丙戌之歲八月吉日忻逢慈谿潤卿秦先生德配周夫人雙慶良辰時則秋月團圓祥風初扇錢業公  
會諸同人僉謀具酒醴笙簧祝先生開八大慶且屬余及門宗姪堯夫來徵壽言余與先生素有知交之雅  
而其哲嗣履直又曾畢業於余創辦國學專修學校誼莫容辭蓋余之欽仰先生者在商而有士行歷考其  
士行之實在不驕不吝樂善不倦而又不忘寒素家風先生幼年喜讀書十五歲由表叔林韶齋先生介紹  
入協源錢莊習業奉沈荔泉先生爲師先生登意習書算不染紛華月俸僅三百緡年終僅得津貼八圓悉

數奉母十七歲丁父憂辦喪盡禮二十二歲周夫人來歸三十二歲協源改名豫源經理羅樾卿先生改任督理舉先生任經理經營十載信用懋著迨至民國八年豫源又易名福源蓋肇基於蘇州程臥雲先生先生服務是莊歷五十餘年與程氏子孫會元四世爲賓主恆以商業道德相勗勉實非尋常貿易家所能幾及也余更有佩仰先生者先生自幼貧苦深知社會清寒子弟求學萬艱爰與同志釀金創普迪學會設普通義務小學於梓鄉恢張二校就學者千餘人亂後仍復舊觀非異人任也先生本任國專校董回憶事變以前仍至錫山飢聞議論兢兢以讀經救國爲言余甚韙之至於歷任上海總商會會長銀行董事會會長中央銀行監事會監事勸募救國公債委員義聲丕著無遠弗屆徐幹中論曰有聲聞之壽有行仁之壽其在斯乎敢晉一觴以爲壽

定海劉鴻生先生六十壽序丁亥

當前清光緒末葉余暫攝農工商部總長頗思擴長起遠馭之規收惠工通商之效延攬實業人才藉資贊助其時尚未識鴻生先生之名也近數年來避地海墻則令聞令望洋洋盈耳丁亥季春吉日忝逢鴻生先生六十攬揆之辰感鄙僚友僉謀爲先生壽及門白君心齋將諸同人意來徵壽文用以挾張實業界榮光或曰先生事業首在水泥廠按光緒八年英商在開平礦務局創辦水泥廠維時風氣胚胎營業未振洎十六年收歸中國三十一年全歸商股易名啓新公司先生於民國十三年在龍華開始籌辦製造水泥廠採石聚土博填磨礱施諸土木工程則防禦鞏固用以橋梁道路則取材殷繁倣陶復陶穴之功成可大可久之業此非宏遠之學畫歟或曰先生事業又在毛紡織廠在昔左文襄公總制陝甘見微知著特在蘭州創設機器毛織工廠後代羣推爲鼻祖先生遠宗其法於是有章華毛織廠之偉舉與北方清河製泥廠聯新鵲和尤可佩者抗戰期中在重慶則建中國毛紡織廠政府以其締造艱辛特予褒獎以示優崇在蘭州

則與政府合辦西北巨資織廠洗毛機構工作殷繁而交通行首先基本投資此非衣被之新猷歟或曰先生事業又在火柴廠考火柴之製瑞典稱雄而中國悠久火柴公司曰上海慶昌曰重慶森昌泰曰華北丹鳳集大成者惟先生在蘇創立之鴻生廠傳所謂名從主人誌慶也尤可佩者抗戰期間政府洞悉企業鴻圖非先生莫屬於是合組後方火柴專賣公司聘先生爲總經理具宏毅之魄力培元氣於閭閻宏濟艱難獨一無二貴陽昆明擴充無限取正位乎離明協司恒之陽燧備哉燦爛此非盛世之庥明歟或曰先生事業又在招商局務前清同治十一年李文忠公撥國幣二十萬緡商股十萬兩成立招商局意至善也然利之所在人爭趨之於是弊竇萌生負債滋重先生摧陷而廓清之爬梳櫛垢增造海元海亨海利海貞四巨輪又增造快輪用資運送攬江海之商樞挽利權於東亞天產軋萬環貨雲屯此非勞來輔翼之宏模歟或曰先生事業又在煤礦開辦煤礦公司歷史頗久先生嫻熟英語締交外賓極夥比時英商稔其才具優長爰介爲經紀先生慨然曰吾常聞國中無煤鐵礦決不能造於富強綜覽吾國惟開灤差堪發展今日銷路之所以不廣者在運輸之阻滯通彈精竭慮闢通六十餘大埠五十餘堆棧高掌遠跡自推銷蘇錫常鎮等處暨及於海陽先生既雄於貲財復得介弟吉生君毅力以左右之先後創辦柳江與華東煤礦公司暨中華煤球廠與特製機器煤球鼓萬物之橐籥范五金於鑪錘此非利用厚生之標幟歟余迺進而昌言曰是數說者洵實業界之初基抑未足盡先生之妙用也夫登泰岱者非立竿而測景莫知其峯之崔巍也泛江海者非據綫以準平不知其波之浩淼也論語贊端木子貨殖億則屢中蓋熟稔商情而善審幾也夫審幾非投機之謂易傳有言利物足以和義先生惟志在濟人利物不自私其利故能擴天下之美利是以攸往咸宜試徵諸事實以教育言之先生耆齡肄業約翰大學備嘗甘苦爰出貲創立定海中學及女子中學敦崇誠樸以樹風聲迄今父老稱道弗衰餘如培植梓鄉清寒子弟賴以有成者不可殫紀約翰特贈名譽



法律博士學位以彰其聲聞又創設定海醫院及時濟醫院秉性仁慈自遐達遐尤可敬者政府嘉先生痼疾在抱飢渴情殷三十四年勝利以來卽任命先生爲行政院善後救濟總署上海分署署長三十五年至本年先生又兼任總署執行長蘇鴻燾於中澤止屋烏於平林大澤之溥未有涯涘仁者必壽斯之謂歟衆咸曰懋哉於是相與詠歌葩經以爲頌曰俾昌而熾俾壽而臧又曰朋酒斯饗躋彼公堂稱彼兕觥萬壽无疆

無錫宗弟婦華太夫人八十壽序丁亥

粵維歲躋丁亥季夏之月朔日忻逢宗弟婦華太夫人八秩設輓良辰宗姪春介滋源慙慙然來請序於余曰世俗鋪張緣飾之習非高堂所願敢請燕許文章以彰臺史余維乾坤之所以不息世道之所以常存者善氣綿延而已矣善氣之在天下正目而視之不可得而見也傾耳而聽之不可得而聞也其善機蘊於一心扶輿旁薄蒸爲德澤其善果則收效於子孫壽考富貴永永而無涯涘吾族先伯子良公隱行善事孜孜不倦邑父老至今稱之弗衰文治於庚午歲曾撰記文以表章之太夫人熟聞彝訓保合太和而近歲以來值東夷內燬滿目瘡痍鴻嗷而鮮戢居烏啼而瞻靡屋太夫人怒焉傷之曰此正爲善時機其可失乎於是無食者食之無衣者衣之無居者居之惠澤逮於鄉閭恩施達乎遐邇如文治故鄉太倉素稱瘠苦亦荷累加矧恤其他各省靡論水旱凶荒兵燹疾疫罔不悉力援救虛廩不辭中庸云天地之大人猶有憾惟在善人有以弭之爲人生之天職太夫人其知此義矣抑聞太夫人淑德懿行其本源蓋自有在太夫人系出錫邑東亭華氏厥考象賢公次女妣楊太夫人閱閨名門世有積德太夫人天性溫厚而處事果毅及笄來歸宗弟鏡遠君上事椿萱下和妯娌一門之內雍雍和也洎乎暮年姑余太夫人年高多病太夫人因避難居鄉必隨時孳舟歸省依依色養十餘稔如一日而母氏楊太夫人年事亦高太夫人孺慕尤殷迨養

居處昏定晨省侍奉歷二十載此其孝行根莖天性有如此者鏡遠君語綵金融盱衡時局以爲懸遷貨殖當以滙上爲中樞維時同鄉周舜卿創設信成銀行請君主任會計君更兼掌路局財務昕夕不遑太夫人恪代子職夙夜罔懈俾君無內顧憂戚鄙成服其才無何遺不造喬木遽摧厲飛戩瑞環珞珥蘭折其芽鏡遠君任事繁劇加以積憂成疾不幸遽歸道山太夫人憐踊欲絕顧念遺孤岷春甫在襁褓汝然曰吾上有衰姑下遺稚子不得不勉忍須臾矣於是飲冰茹蘗垂三十年其松柏貞操有如此者易節卦稱苦節又稱甘節吉天道人事由苦而甘乃必然之理宜乎岷春姪驕驕發軔騰達天衢紹封鮒之家風潔白華之養志尤爲近世所難能也溯自鏡遠君逝世後其清風高節無一瓦之覆一壠之殖孤苦伶仃無殊宋之歐母太夫人感來日大難深維村居較爲簡約敦請於姑余太夫人遷居於東鄉嚴鎮別業料量米鹽計入爲出竹頭木屑靡不珍儲衣不重裘食無兼味其勤勞儉德更有如此者岷春幼頗好弄太夫人緣督綦嚴督訓之曰汝父所遺惟汝所望於汝者其大惟望汝仰體親心勉爲賢人君子否則其毋母我及岷春登仕版又訓之曰仕途易於墮落而取與一關尤爲一身大節所繫務宜清廉自矢懷先哲四知之戒義不苟取庶幾無忝所生岷春窮窮受訓於是出佐政權退營商業一介無妄取遐邇咸欽家法蓋可以風世矣綜太夫人之德行曰孝曰節曰儉曰勤而其訓子之真切則尤出於慈又秉聖經之教見善如不及源源施濟如川之流魯頌之詩曰復周公之宇壽母燕喜際茲復宇之時正值壽母稱觴之日行見祥和之氣由一家而達於一鄉而推於一國豈不懿歟岷春規撫慈範本屬好善之士其益勉之哉

答曹君叔彥書 戊子

自春徂夏言念君子我心如海昨奉四月十日手書藉稔邇來道體安康而心緒悶損至爲敬念譜妹劍秋女士天性孝友兼擅才華天不永年吾弟失左右手同深惋惜來書異常沈痛讀之慨然大著傳文及哀輓

詩定多傷心悅目之語譜妹自此可不朽矣竊意至性中人固難太上忘情但氣數適然雖聖賢亦不能免老耄之年精氣神三者尤宜葆攝尊體素有肝陽慎防觸引移祈達觀自玉切禱切禱兄僑寓滬濱仍前講學讀經救國四字永矢弗緩平居惟以易憂患九卦心誦心維藉以自遣而於履之初二兩爻及復之初爻尤往復不置先儒謂論語我欲仁斯仁至矣二語即本心之一陽來復此境最爲有味又并以辨義一語深造之使物各得其所即精義入神之域故曰過此以往未之或知即孟子所謂聖而不可知之謂神故下文云窮神知化德之盛也若大有之自天祐之二句其根柢全在積善大象傳曰君子以遏惡揚善順天休命善者天之所命二爻曰大車以載積中不敗即積善也孟子大舜有大焉善與人同即大有同人二卦曾文正欲以取人爲善與人爲善八字每日作爲常課載諸日記實爲學聖基礎絮絮言之非敢云自道心得冀稍解吾弟之憂悶耳道衡姪孫在兄校中肄業禮貌恂恂不愧大家矩範可造之才亦可喜之事也臨池惓惓並以告慰

答馮君振心書丁亥

接十九日來函并大著客齋說茲敬評閱寄回天下盡客也惟在我本心有以自主古人所稱立德立言立功及兄平日立志所謂正人心救民命者一卽口頭講實亦極有益一當可反客而爲主矣陸子靜先生云收拾本心自立主宰王陽明先生主良知之學胥是道也兄近作楹聯云立德立功立言導生民立本命有歎有爲有守冀中國有聖人又撰一聯云人生惟有廉節重世界須憑氣骨撐聞交大吳校長擬懸諸文治堂矣國文經緯貫通大義已四版望與素堂弟商洽倘需採作課本卽可應用然亦不拘也近又纂孟子救世編倣朱子分類法略加擴充爲十類聽講園孫繆二君爲用宣紙精印約閱月餘出版容再寄奉嘗謂養浩然之氣須先存平旦之氣朱子所謂神清氣定此心常存庶幾近道老子所謂湛兮似或存亦卽此義此

爲存心養性入門法願與諸賢共勉之

答黃生光灝書 戊子

正深馳系適得十五日來書忻慰奚似足下師武侯溫公十六字爲從政南鍼光灝來書以誥爲公則誠有實地爲法洵足以去私戒浮挽近代頹靡之習邇來民生憔悴極矣魴類潛淵鴻嗷徧野言念及此至爲痛心湘省爲產米之區能稍免物價波動否尙希本學道愛人之旨一面去莠衛良一面拯救民命庶幾保合太和消除劫運孟子云今人乍見孺子將入於井皆有怵惕惻隱之心小民皆吾孺子也沈溺於水深火熱之中惟在仁人君子有以急救之故今日爲吏不在精明強幹而在葆我良知兄近撰聯語云老吾老及人老幼吾幼及人幼天下溺由已溺天下飢由已飢幸賢者採納之



# 茹經堂文集六編目錄

## 卷四 序跋類

同族保謙公孝善遺型圖總序甲申

無錫周氏世譜序丙戌

武進張氏族譜序丁亥

武進章氏宗譜序戊子

毘陵劉氏宗譜序戊子

武進袁氏續修宗譜序丁亥

青陽黃氏續修宗譜序丁亥

古隍朱氏續修宗譜序丁亥

無錫顧氏續修支譜序丁亥

江陰唐氏續修支譜序丙戌

崇明顧氏詩禮永懷圖序乙酉

太倉修理文廟暨四先生徵信錄序丙戌

吳縣沈信卿先生詩文集序丁亥

無錫奚文憲先生詩文集序乙酉

無錫華藝三先生八十有五壽詩序乙酉

嘉定陳仲達先生行政練習序乙酉

嘉定陳仲達先生民國政治文選序丁亥

嘉興錢君海一辭辨序乙酉

嘉興王君瑗仲文集序乙酉

太倉季君調卿詩文集序丙戌

上虞沈君思敏顏子傳略序丁亥

泰興丁君素堂曾子學序丙戌

崇明沈君汝梅適庵叢稿序戊子

孟子救世編自序丁亥

三民圖書公司二十年紀念刊序乙酉

醒獅月刊序丁亥

伉儷月刊小序丁亥

伉儷月刊小序二丁亥

高君踐四傳跋丁亥

# 茹經堂文集六編卷四

太倉唐文治蔚芝著

## 序跋類

保謙公孝善遺型圖總序

甲申

甲申之歲族姪滋源請題唐氏孝友樂善圖余既爲之序聞揚明德今歲孟冬族姪曄如以乃考保謙公孝善遺型圖屬爲總序保謙公與余爲昆季行平生天性孝友樂善不倦茲者曄如姪浼族兄企林君繪其善行爲圖十幀曰家訓垂後蓋保謙公平生私淑湘鄉曾文正以尙禮義蓄道德爲立身處世之本其所以昭示曄如昆季者也曰內助輔仁弟婦陳夫人慈仁勤儉與保謙公勉同心孳孳爲善隆冬必手製棉衣百數十襲分送慈善機關闔之仁由家庭而推諸社會者吾於弟夫人見之曰建倉瞻族保謙秉子良公遺澤壁畫營建邑東北嚴家橋倉儲歲值凶荒必櫛風沐雨策騎下鄉蓋所以繼志述事昕夕不遑者也曰廣廈儲材保謙公本宜聖益者三友之義嘗斥鉅貲建築益友學社與申伯弟協力主其事二十年中作育人材於斯爲盛至今曄如昆季追念先德年費鉅貲在大學設有保謙公獎學金額以惠寒賤益見保謙公譽髦斯十德澤孔長也曰闢宇宏善保謙申伯紀雲昆弟樂善好施斥貲恢擴普仁慈善會屋宇廣結善緣至今口碑載道曰規復名蹟黃埠墩爲錫邑名勝原名小金山民十二燬於火至今湖光山色煥然一新蓋曄如昆季將保謙公六十壽貲移以重建者也曰助修專祠曰誼篤友于曰力興實業曰苦塊誦經皆保謙公至情之所推也余一一恭閱之歎曰盛哉保謙公積善無涯矣夫天地之間善氣而已矣善氣充積則子弟飲之無不聰明而端恪者若飲不善之氣則乖戾隨之矣一家如是一鄉如是一國亦如是聖賢之世親



親仁民仁民愛物俾各得其所其善氣之彌綸豈不大哉吾族自子良公孳孳爲善其善氣之旁薄周浹於家庭之間飲其澤者靡不秉其彝訓遠邇汲汲以行善爲當務之急茲者曄如姪秉承先志屬企林宗兄繪爲斯圖並各附以小記觀乎此者孝弟爲善之心有不油然而生者哉方今民生憔悴屋烏靡止凡屬無告窮民無異倒懸不啻環侍於吾前呼號求救故士君子生今世實爲善大好良機惟善緣善因稍縱即逝孔子曰見善如不及此之謂也曄如姪續修前緒聆善言發善行夙興夜寐忘憊憊悶憊夫虞舜之大德不過取人爲善與人爲善兩端孟子之贊舜曰聞一善言見一善行若決江河沛然莫之能禦舜人也我亦人也有爲者亦若是爲善而已中庸曰天之生人因材而篤深望曄如姪益栽培善果孳孳無倦錫類推恩吾族咸守保謙公之遺訓飲保謙公之善氣他日者位祿名壽隨之詩曰宜爾子孫振振兮又曰復周公之字俾熾而昌今當太平復字之時正太和保合之會余故樂爲之序忻喜之意爲何如耶

無錫周氏世譜序丙戌

論語首篇第二章言孝弟爲仁之本而下九章卽載曾子曰慎終追遠民德歸厚明顧亭林先生贊之曰孝弟人倫之本也追遠孝弟之本也甚哉有子曾子之言似夫子也禮曰萬物本乎天本乎祖木著於地謂之本故生民必追溯其先人人豈可忘本乎哉然則人生何以能不忘其本宗譜而已矣丙戌仲冬周氏華胄松泉宗實守義守信學德諸君介及門許君岱雲郵踪續修宗譜述略徵序於余披覽之下歎曰敬宗收族之道在是矣按吾錫乙虞橋周氏系出泰伯虞仲歷傳五世孫諱章其少時子諱贊封安陽侯維時在吳越未分以前變野蠻俗成禮義邦春秋時大賢延陵季子實紹其傳遞嬗三十二世有禪承公諱虞者避秦亂徙閩南而乃弟敬承公諱虔者又徙洛邑閩南爲周氏嫡派洛邑其分支也五代時七十一世有甯遠從遠二公昆季競爽從遠公官道州因家於任所宋濂溪先生卽其後裔又爲道州分支而甯遠公仍家閩南

同安周氏嫡系洎七十三世有瞻崖公諱瀛者舉紹聖進士暨厥子濱海公由閩南赴潤州節推任父子緬懷梅里休風義重首邱將卜居於太湖惠麓間中值靖康之難金人謁張祠宅洛社之東偏旋徙乙虞橋之南遂占錫籍千百年來子姓繁衍喬木森森縣延世澤其盛矣夫攷是譜自清光緒丙申續輯距今五十餘年矣民國戊辰之春議修未果邇者國土重光同族重申前議采訪纂輯載更寒暑甫蒞其事將壽諸黎棗嗚呼孝弟之至通於神明其繼志述事之意可謂至矣司馬遷作史記纂世家以泰伯居首崇列傳以伯夷居首崇讓德也大學云一家讓一國興讓讓之時義大矣哉余嘗謂三吳文化開山者爲泰伯虞仲其主旨在讓天下祖而禰之者爲季札志在讓國濂溪先生出自道州分支而著太極圖說通書探性命之奧變後學奉爲儒宗周氏子孫皆當服膺弗替者也宋蘇老泉先生文學家也其作蘇氏族譜引謂以一人之身分而爲兄弟遞推遞遠甚至不相識視若途人幸其未至於途人也而有以收而萃之不至忽忘則宗譜豈非敦本之要圖乎是故凡考宗譜者孝弟之心可油然而生此則道德家之名言矣今周氏子姓兢兢於宗譜之修輯惟望其後起者益勉其孝弟之美德而紹述仁讓之遺型詩曰威儀孔時君子有孝子則其錫類之祚胤當永保於無疆也

武進張氏族譜序丁亥

萬物本乎天本乎祖凡人不可以忘本故敬宗收族之義仁人孝子咸於是兢兢焉漢班孟堅有言工用高曾之矩矱農服先疇之畝畝吾嘗謂孝弟力田服疇稼穡而因之起家者其歷世必能長久何者以其辛苦勤劬而得之也丁亥季秋武進張氏續修宗譜屬其宗人泉生君紹介來問序於余余考其例凡爲傳三十有五序二十有一世系考世表世系圖元元本本於先世之善言善行靡不畢載余維古之聖人聞一善言見一善行若決江河沛然莫禦善言善行自古爲重今按譜載瑞寶公之垂訓曰天生人而假手足是明

界以謀生之具人惟甘於怠惰斯自入於飢寒之路否則衣食故在也取之手足間裕如矣此善言也天生人而界以手足卽宇宙間自然之機械手足一日不惰卽機具一日不息大學所謂爲之者疾用之者舒爲之者手足之運行也用之者衣食之瞻足也其義與聖傳相發明矣又按譜載惠斌惠恩昆季二公對於鄉間諸善舉均無所吝惜其犖犖大者如近村往來大道每屆霖雨民皆病涉有深風淺揭之歎二公倡義合資改築石路鄉民便之傳作口碑又載玉崧公克勤克儉雖處境稍豐而衣食不異寒素素有以輕裘進者則厲聲曰汝曹惟奢華是尙吾敢忘祖訓耶却之不御夫儉德之恭也此善行也余更有進焉者居今之世惟以勸善爲當務之急孔子歎善人不可得而見孟子以孝悌爲善稱舜徒樂善不倦爲天爵夫行善之方有善因有善果善因者在無形之中宜隨時體察之所謂見善如不及是也善果者積德既厚或本身或子孫享其報所謂積善餘慶俾壽而富俾熾而昌是也而善氣善機必自一鄉始孟子所謂一鄉之善士斯友一鄉之善士一國之善士斯友一國之善士今張氏後嗣誠能積善流光由一家而推至一鄉他日者擴而充之更廣之於一國磅礴輪各正性命孝經孝治章言天下和平災害不生禍亂不作豈非善氣之所鍾成太平之盛軌哉夫爲善時夫爲善時機稍縱卽逝萬不可交臂失之者也爰序之以爲張氏宗族勗若夫子姓之繁盛世次之傳燴具詳於前人所述及世系各表中不復贅云

武進章氏宗譜序 戊子

凡生於天地之間者皆曰命天道好生惡殺民命之重於天下久矣易傳言保合太和各正性命惟養太和之元氣者乃能保當世之民命戊子仲夏武進章君子安介及門蔣生石渠徵譜序於余余受而讀之於練夫人保全民命一事不禁爲之歎息起敬往復流連而不能已已也練夫人者章氏太傅公諱仔鈞字仲德之德配也維時值五代爭雄干戈俶擾公方任西北行軍招討制置使軍事悉歸統制有二校曰邊鎮曰王

建封衛公命求援於建安以兩潒後期至法當斬練夫人爲一言以救之繼令急走並助以資斧二校感泣而去且誓曰有恩不報非人也卽投江南事李氏無何太傅公薨建封奉命平建州亂稔知練夫人家城中兼程急趨建安謁練夫人於編戶家方是時前鋒將士將屠城練夫人曰妾身已老願先冒白刃死建封驚曰奚爲出此言練夫人曰今城中居民烟火萬家皆善良無辜妾不忍見屠城之慘酷聞萬衆之哀號決願先死建封大感動迺如練夫人言祇誅倡亂者數十人餘皆赦歡聲雷動聞數十里嗚呼練夫人一婦人而能至誠惻怛救民若是古語有云仁人君子於垂絕之民不啻慈母伏其將死之子吾於練夫人徵之矣天道無親常於善人宜乎有子十五人有孫六十八人簪纓相望昌熾無疆也他如良能公力尊國體用康公殉難延平皆卓賡可傳者抑余常謂譜牒者人道之根源而仁義之奧府也易傳言立人之道曰仁與義仁字从人从二上一爲我下一爲人則千百人之所推而羣生之所由萌抵也故曰仁義字以羊以我羊雖小物而跪乳有孝之道善系亦以羊故萬物善必自孝始下以我者言裁制萬物得其宜咸出於大公而不自私故善舉又稱義舉而民族中公田公產稱義田義莊胥此意也昔時有合族同居一處者卽稱某家村某家莊迨其後也散處四方有同族不相識者宋蘇明允族譜引言一人之身分而至於途人此勢之無可如何者也幸其未至於途人也使其無至忽忘焉可也冒哉言乎夫欲使分者而知其合疎者而知其親則非修明譜牒不爲功矣若夫章氏三大宗支曰塘橋曰厚餘曰丁堰其世系源流已詳毗陵錢名山先生譜序中不復贅而余作是序不惟兢兢於章氏審諦昭穆敬宗收族之道而於教孝勸善大原竊三致意焉故於練夫人保全民命一事大書特書見人命之重於天下爲後世嗜殺人者告商頌長發之詩曰有崧方將帝立子生商大雅生民之詩曰厥初生民時維姜嫄詩人尊似續妣祖若此妣先於祖卽既右烈考亦右文母之義也嗚呼太傅公刑於之明德益遠矣章氏子孫恭讀斯譜其對越祖考丕顯丕承爲何如哉

毘陵劉氏宗譜序戊子

人生天地間歷劫而不磨者惟忠孝氣節而已忠者未有不本原於孝而孝者未有不推擴於忠孝經曰資於事母以事父而愛同資於事父以事君而敬同愛敬之原根蒞於至性至情非可矯飾而致而所以感發天性勿替而引之者則歸攝於宗譜戊子季秋及門巢生嚴蔣生庭榮以毘陵劉氏宗譜寄眎屬爲序言余維劉氏世系源遠流長而不顯於宋代屏山先生開性理學之心傳爲朱子師余弱冠時研究理學深服膺焉至性至情發爲忠孝余於是譜三忠蓋尤加敬焉三忠者一諱韜屏山先生之考也宋靖康時死於金元尤之難一諱子羽屏山先生之長兄也常慷慨自許有捐軀殉國之志一諱琪屏山先生之姪也官樞院犯顏力排嬖佞小人皆側目嗚呼忠節萃於一門史冊爲之增色余嘗謂理學氣節盛則正道興理學氣節墮則正道晦豈不信哉世之衰也士夫脂韋澳涇卑鄙貪汙而國事淪胥以敗孟子引詩至於其何能淑載胥及溺未嘗不廢書而太息也余故序劉氏宗譜特揭斯旨俾天下後世知忠孝爲人生之大本氣節爲治世之綱維宋文信國正氣歌云是氣所磅礴凜冽萬古存地維賴以立天柱賴以尊奮乎百世之上百世之下焉有不鼓舞而興起者哉吾願劉氏子孫咸守忠孝傳家之旨而讀是譜者亦相勉於忠孝氣節皆葆其良知講求道德而毋墮人道之大原哉

武進袁氏續修宗譜序丁亥

論語言君子務本本立道生孝弟爲仁之本小戴禮記言三王祭川先河後海或源也或委也此之謂務本字義本著於地謂之本本離地卽枯槁猶孺子離父母必飢渴顛踣以死故孝爲德本凡人之生不可忘本也自後世釐別宗派別子爲祖繼別爲宗繼禰者爲小宗宗法秩然而尊卑之分明隆殺之義定遠近親疏之等釐然各當於人人之心於是天下皆知人本乎祖之誼而宗譜興焉故曰本者譜也惟敦本於是乎修

譜歲丁亥春仲武進袁氏纂修宗譜其華胄紹安漢生景安慶裕正培諸君介及門秦生和鳴請余爲序按袁氏代有名人東漢有袁安者臥雪茹貧高尚其事守道之君子也晉代有袁宏者文才淹雅撰集後漢記別出鑒裁儒林之通才也宋代有袁樞者秉性峻直喜誦溫公資治通鑑嘗區別其事而貫通之輯通鑑紀事本末此史例之別出心裁者也明代有袁黃者字了凡創立功過格每日記載教人敦品修行官兵部主事時日本侵朝鮮曾佐經略宋應昌往征多所策畫仁者必有勇豈非然哉史學家有喜談袁了凡鑒鑑者俱津津樂道之也而余更有進者士大夫生今之世當以氣節爲立身之本有氣節而後能擎天柱地臨大節而不可奪回憶四十年前余供職清代總理署時曾追隨桐廬袁爽秋先生諱昶者矯亢不阿警譽謬謬心焉師之卒以參劾拳匪得罪朝貴爲所害古直臣丰裁如在目前諡曰忠節余哭之以詩曰綠章萬口傳寅直碧血千年怨子規頗爲時人傳誦宋蘇老泉謂讀蘇氏族譜者孝弟之心可以油然而生然則讀袁氏族譜者氣節之思當更奮然而起也武進荊墅村袁氏素稱望族考是譜緣起始於明代萬曆時累代纂輯迄今十次諸君孝思不置水源木本之志尤近世難能而可貴者也若夫世系之繁盛傳壇之次序俱詳於前人序記不贅述

青陽黃氏續修宗譜序丁亥

人生以不忘本爲先而務本以追遠爲急宋范文正之設義莊贍宗族而家世食貧者力有未逮則莫如修譜譜牒之學始自六朝紀載詳贍傳諸後裔綿綿延延而勿替斯爲敬宗收族之最可貴者降及後世倫紀寢衰甚至有數典忘祖不復憶其高曾之諱者世所謂不仁不智古人所由以三世不修譜牒爲不孝也歲踰丁亥六月江陰青陽黃氏續修宗譜屬錫邑戈君子才來介屬爲序言且告曰斯舉也黃氏君梅金玉祉勳介人諸君共同主持兢兢業業而成焉者也余作而嘆曰甚矣黃氏諸君之孝思不置也孝經云天地之

性人爲貴人之行莫大於孝孝莫大於嚴父由本身而上溯之吾之祖考卽吾父之父也吾之曾祖卽吾祖之父也身也者親之枝也父母全而生之子當全而歸之自是而慎行其身保其身體保其神明愛我同胞如愛我身體立身行道大者尊親其次弗辱其下能養終身不忘其親敦崇品行勤修學術舉世成彬彬焉莘莘焉無有越乎禮法之外者則宇宙太平之兆實基於此譜牒之中矣漢有黃氏諱香者冬夜嚴寒常溫親之衾被此爲冬溫夏清之法式明末有泮浦黃忠端諱道周者著孝經集傳一書爲日月不刊之作人生必讀之書忠端公在獄中時又嘗手書孝經百冊聞至今手蹟尙有存者惜不得一見也忠孝大節炳耀日星凡此俱足爲江夏世家模範若夫世系之源流果葉之功德則宋朱子之世系歌與張南軒楊萬里諸先生之序文均已詳述余特表續譜興存之大端首著於篇蓋水源木本之大義權輿此矣

古隍朱氏續修宗譜序丁亥

歲次丁亥季秋古隍朱生延璽因續修宗譜蒞事浼及門徐生萬里慇懃來請作序言予嘉朱生孝思誼不容辭爰書其簡端曰攷朱氏得姓遠在唐虞時尙書所載朱虎熊鰲是也系出高陽周初封其後於邾子孫去邾爲氏始爲朱氏子姓繁衍散居各行省洎南宋新安朱文公出爲一代名賢傳授道統彪炳寰區是爲道德教育之宗奮乎百世之上百世之下讀其文集語錄者高山景行相與私淑奉爲矜式夫新安子姓與古隍子姓是否同宗不可攷然固朱氏之大光寵也吾又謂道德必根於性情有至性者易於入道朱子放賑詩云若知赤子原無罪合有人間父母心性情中人讀之墮淚更推而廣之如宋天長朱壽昌母劉氏他出壽昌尙幼母子不相見五十年熙甯初壽昌棄官刺血寫經行四方求之遇於陝州迺迎母與二弟歸當時蘇東坡王荊公作詩歌以美之有明泰州朱恕樵薪養母一日過王良講堂譌曰離山十里薪在家離山一里薪在山良聞而異之招爲生徒以勵孝行嗚呼此二人者同出朱氏其性情懇摯若此與曾子歸耕歌

所謂往而不返者年也逝而不可追者親也又曰孝有不及父母既沒雖欲孝誰爲孝乎其至情至性殆無異也今觀朱氏族譜體例謂立身品概先德行而後才藝大都孝弟爲重耕讀次之顯親揚名孝弟大端故科名次之藝黍率車孝弟實事故能創能守次之善夫孝弟爲人之本朱氏子孫當弗替引之矣

無錫顧氏續修支譜序丁亥

余曩讀崑山顧亭林先生文集曰論語首章言學次章言孝弟爲仁之本以下又記曾子之言曰慎終追遠民德歸厚善哉夫學者所以明人倫也孝弟人倫之本也慎終追遠孝弟之本也人倫明於上則小民親於下斯言也如日月之經天江河之行地千古不磨者矣丁亥仲冬錫邑顧康伯先生因族中續修支譜躬躬焉兢兢焉來請序於余余爲之肅然曰盛矣是真亭林先生之遺緒康伯諸位先生實能善繼其志善述其事者夫謹按顧氏先世本居崑山系出三國時吳丞相諱雍之後子孫綿延弗替至明代隆慶時有榮祥公卜居崑山華定鄉天啓時有玉麟公諱鶴因魏璫煽虐逮捕周忠介公諱順昌吳氏顏佩章等五人憤擊促騎蘇省震授玉麟公勿遽徙無錫之荅湖莊是爲遷錫始祖當是時家業中落宗譜因之散失遞傳至六世孫聞鐘公諱錄七世孫儀卿公諱鴻遠晉川公諱汾影恬公諱灝經營貿易家道蒸蒸日上數十年間貲財殷阜邑中善舉胥賴維持蓋其種德深矣洎三公相繼逝世繼起者又有八世孫曰瑤字輝吉曰璫字春坡曰球字達甫九世孫曰寶書字森伯曰維賢字幹臣諸公會議修輯宗譜擬定名爲錫山顧氏支譜合計當時人丁已五十有餘於同治十二年冬月功告訖成道光緒丙午年幹臣公提議修譜而未果幹臣公者康伯先生之尊人也今康伯立志續修可謂孝思不匱者矣而余竊有進焉者亭林先生學術行誼炳耀日星吾輩後生常抱高山景行之願茲者康伯先生續修支譜繼自今以往惟望顧氏後昆相與志亭林先生之志學亭林先生之學勿替引之夙昔故老傳聞亭林先生於所著郡國利病書外別有黃紙結繩數千堆積



屋之半楹告其家人曰吾一生精力盡萃於斯逮先生歸道山執友李二曲先生來弔家人導示之李大哭曰方今文網周密速焚之家人開視其數捲則每邑之形勝若何攻守若何具載無遺蓋擷郡國利病書之菁華而益以用兵方略其規復明代之志至死不渝忠貞亮節奮乎百世之上百世之下聞者莫不興起其斯之謂歟顧氏後賢其勉之哉余本婁人也地與崑山接壤瞻玉峯之曉靄覽崑塘之煙波慨焉遐想安得有亭林先生者出而正人心挽頹俗則余與康伯諸先生庶幾同享昇平矣夫後之讀是譜者當人同此心同此理也夫

江陰唐氏續修支譜序丙戌

我唐氏得姓始自陶唐堯舜之道孝弟而已矣孝弟爲人倫之本豈非唐氏最初之彝訓哉周封公侯唐叔最著康誥斯作孝友是重遞傳千餘載後李氏淳興唐遂爲建朝之號惟時有諱儉諛襄者事親以孝聞佐太宗定鼎圖形凌煙閣宋代有諱傑者生二歲卽知孝經祖母蔣氏病目失明傑以舌舐之良有效劇賊孔彥舟犯邑城傑負蔣氏號哭突圍出賊敬其孝舍之事載史傳有明中葉毘陵荆川公文武兼資卓然爲一代儒宗文治昔年曾撰其讀書處碑記高山景行雖不能至心嚮往之焉然更有進者近世貪冒之風日甚邦之阨阻實由於此非得清廉勁節者痛矯正之不足以振起頹俗前清咸豐時鏡海公諱鑑者以特薦會文正督師令聞令望輿誦翕然於是善化之唐彪炳遐邇其廉介清操尤有令人欽敬者自維介陋所聞於長老之稱述載籍之紀錄者如此歲躋丙戌江陰宗人耀和全寶宗望佩基佩元雲漢樹章風儀等以書來請曰我江陰章卿太平橋唐氏一支原屬武進白鶴溪治中華甫公後洎前清順治九年十一世孫養淳公創輯支譜至光緒五年譜凡一創三修迄今又越六十七年宗人等深懼歲久遺忘漸就湮沒爰由風儀任主稿諸同宗分任採訪徵收等事計自乙酉冬至日始凡歷一載而竣事敬請一言以爲序文治恭閱之首

列序目誥命訓規次世系世表又其次凡例家規及傳序墓誌等井然有條秩然不紊不禁肅然起敬曰盛矣夫昔司馬遷有言天者人之始也父母者人之本也人生天地間孝弟敦睦天下之大本也擴而充之至於中和位育天下之達道也皆天職也凡我唐氏公族聰聽彝訓自必讀經敦品心體躬行他日者根茂實宏天保穀穀俾昌而熾俾壽而臧其庸有涯涘夫其盛矣夫

崇明瞿氏詩禮永懷圖序乙酉

搢紳者一國之元氣也詩禮者一家之元氣也惟搢紳家舉能誦詩讀禮而後能修明倫理保合太和其効在無形之中未可爲淺識者道也崇邑同鄉瞿君季剛以詩禮永懷圖屬爲記余展讀之見其家傳所載先德之言欲以學術救國以道德救人心而立身行事必本於孝弟忠信允矣老成人之言爲千古不磨之論而季剛之緬懷明德念昔先人爲近人所難得也竊維孝爲德本教所由生而欲培植其本根道在學詩禮而已論語載聖人庭訓不外學詩學禮微特爲天下搢紳之法式且爲後世人心世道計者至深遠也夫孝道莫備於詩禮詩既醉篇言孝子不匱永錫爾類又曰釐爾女士從以孫子見傳家之久長不在富貴利達而在孝弟之子孫其他散著於蓼莪苞栩陟岵諸篇悽愴惕惕皆足以感動人心魯頌曰靡有不孝自求伊帖孝非爲求福而受福者必本於孝讀天保第四章可知矣孟子言事親從兄曰禮之實節文斯二者是也孝弟節文莫備於禮小戴禮記曲禮篇冬溫夏凊昏定晨省出必告反必面視無形聽無聲何其委曲而詳盡也若夫內則一篇上慈下孝穆穆雍雍所以講德於兆民又何其懇而摯也而其中載曾子之言曰孝子之事親也樂其心不違其志樂其耳目安其寢處以其飲食忠養之其曲體親心無須臾或失焉至大戴禮記曾子立孝大孝各篇皆娛親養志之法而疾病篇曰父母既沒雖欲孝誰爲孝乎年既耆艾雖欲弟誰爲弟乎故孝有不及弟有不時其此之謂與而蔡邕琴操載曾子歸耕歌曰往而不反者年也逝而不可追

者親也仁人君子讀之潛焉出涕矣今季剛斯圖非皆本於先賢之意與嗚呼凡人孰無父母孰無兄弟披覽茲圖益將神遊於重華之庭宗聖之室下武之詩曰永言孝思孝思維則古之聖賢不第盡一己之孝且將廣其孝於天下而示之模範吾故特爲之記以勉季剛且以勉天下之孝子

太倉修理文廟暨四先生徵信錄序丙戌

慨自丁丑事變擾攘八年我婁水弁山俱在島夷蹂躪之下泮水宮墻鞠爲茂草殿墀尊嚴之地易爲圉人遊牧之場四配神龕毀夷殆盡兩廡丹楹繫馬齋之如追蠡過之者觸目傷心吞嗟涕洟可勝嘆哉此外如吾鄉先哲陸陳江盛四先生祠初則又以鐵鳥所經震驚墜圯風雨漂搖莫之顧問而時昔都講撰杖之地淪爲犬羊窟宅又所弗論兵之爲禍烈矣曩歲抗戰勝利撥雲霧而見青天丙戌之春吾鄉諸父老昆弟輩推原國亂之暴起皆繇于聖教之陵夷時以喪亂初平籌款萬艱用是小葺四先生祠先資號召而熱心毅力者聞風興起於是後海而溯先河鳩工庀材督修文廟不遺餘力自春徂秋功告訖成而四先生祠宇亦得兼營並進輪奐聿新齋舍僉備主其事者爲陸君勤之而金君鴻蓋陸君博泉朱君鐵英張君拜彤趙君耀如諸同志或仔肩募款或董理工程均足以彰勞動而光里乘自茲以後同人規約春秋二祭祀孔後一日爲釋奠四先生之期永留紀念誠盛典也茲者修理文廟及四先生祠各項收支徵信錄將次印行及門陸君博泉郵屬序言爰謹書數行用志慶幸并質諸邦人君子以教之

吳縣沈信卿先生詩文集序丁亥

嗚呼學術之盛衰豈非視天心氣運爲轉移哉君子知天心之不可測不得不與天爭然雖與天爭而卒不能勝天者此理之當然實數之無可如何者也當前清光緒之季拳禍擾攘以後當事者頗思勵精圖治振興教育培養人才吾蘇爰設教育總會於上海林蔭路請信卿先生主辦其事惟時余監督南洋大學任會

長者四年月必會晤四五次各邑教育分會總會實董其成當是時人才鱗萃楊君翼之雷君繼興蔡君松如史君量才相與奔走其間某邑之教育良某邑之教育未善某邑之人才盛某邑之人才未興皆得匡之直之從而振德之學校事業蒸蒸日上達可謂極一時之盛矣余因欽佩先生嘗欲延先生兼任南洋大學庶務長先生曰兼職恐心力不專爰薦同鄉夏蕉飲先生以自代天運机阻世變元黃教育總會取銷與各邑教育亦遂隔閡余與先生遂不經見越四五年偶於友人座上相值形容消瘦驚訊之則曰曾遭傾跌耳蓋其憂傷憔悴者深矣可勝慨哉鴻印圖書館者先生所特設也月必數至焉余深冀其優游泮奐可以頤養天年乃又越數年聞先生竟歸道山矣余爲不怡者累月先生卒後同人亦各星散無復友朋相聚之樂矧時局滄桑一經敵寇之內變再經勝利後風俗人心如江河日下靡所底止有心人竄歎頹息藉使先生尙存於今日其感嘆當復何如哉予室翹翹風雨漂搖追維往日曷禁霑襟之浪浪也丙戌仲冬先生壻胡君厥文哀集先生遺著曰越齋詩存凡六卷曰華梧軒文存凡四卷曰教學片羽二卷此外尙有自撰無成人傳年譜行述并著述目錄暨哀誄祭文等都若干卷將授諸梓人來問序於余余受而讀之俯仰數十年來世變之大棘朋舊之凋零昊天孔昭我生靡樂旁皇執簡不知所云嗚呼唏矣爰勉綴數言以見文章與世變相因吾輩雖欲與天爭而無力以回天也敬以告當世讀先生集者

無錫奚文憲先生詩文集序乙酉

天地歲穀剛直之氣綿延歷終古不息其在人也播之爲事業發之爲文章而文章又因其人之性情品行萌軼而出桐城姚姬傳先生有言觀其文諷其言則凡人之性情行狀舉以殊焉余常申其義曰凡文之勁達以健者其人必剛正磊落者也凡文之篤實以舒者其人必敦厚忠信者也故凡閱文而不能知其人者非精於論文者也丁亥孟夏及門奚生干城攜其祖考文憲先生遺著見謁並述先生易簣時之言曰吾

爲諸生逼處貧困無所恨惟有遺文三百餘篇古今體詩千餘首俟孫輩學成爲吾梓而行之可無缺憾於地下矣敢乞先生爲序以垂不朽余受而讀之覺其正直豪邁之氣流露行間雖摹給小品亦感時撫事必歸於正大精剛之域因作而歎曰自周易著直方之訓洪範有平康正直之文而孟子論養氣之方曰至大至剛直養無害塞於天地之間此言人之養氣也而文章之道在是矣夫一鄉有正直之士立人倫之模範則一鄉子弟感其化亦皆侃侃諤諤無有諂諛而卑污者世衰道微言行不復相顧於是士皆習爲機械變詐不知人間有愧恥事嗚呼可鄙也亦可傷也先生弱冠後卽有聲庠序間敦樸劬學自壯訖艾常捐資創設高等小學於本邑安陽山麓來學者踵相接弦誦之聲洋洋盈耳乃因家道日落不得已輟講侶僚無聊作詩文以自遣至貧困以終論者以爲天之待先生氣數無乃過膏肓詎知君子之澤積久彌光迄今鄉之人咸感頌之曰此詩書彝訓文憲先生所留貽也戒後進毋敢忘然則先生之教深入於人心流風餘韻累葉弗替天之待先生抑亦厚矣清初平湖陸稼書先生論師道曰天下有興起之師有成德之師興起者廉頑立懦拔人心於陷溺之中成德者砥行礪名造人才於粹精之境今先生剛正之行無愧興起之師矣若夫雖離以和肅肅以敬成人有德小子有造後生學子其可不自勉乎抑余平日教育宗旨惟以孝弟爲先務之急丁丑歲余挈諸生避地長沙以達湘鄉聞干城令姊瑞珍以金釧一事交干城曰以此爲川資速隨唐師去干城因得偕余行在桂林畢業此孝弟至誠之行豈非先生家教所流傳耶詩大雅既醉篇曰孝子不匱永錫爾類余嘉干城之孝思爰序述先生品詣文章俾弁諸集首烏乎宇宙大矣其懷才不遇屯艱否塞以終者胡可勝道惟在後起者有以表章之爾中庸曰善繼人之志善述人之事並發揚斯義以勗干城

無錫華藝三先生八十有五壽詩序乙酉

無錫同鄉華藝三先生長余四歲與余締交四十年瞻其貌藹然而可親聆其言秩然而中理觀其行綽然

而寬仁恂恂乎君子人也乙酉仲冬先生年八十五矣同里德生榮先生以先生重游泮水詩來屬和余愧不能詩爰作序文以賀曰吾鄉自東林高顯諸賢講學以來代有傳人而如先生之品重圭璋令聞令望不數數觀蓋先生醇精道德涵養有素固將壽心以壽身壽身以壽鄉而推之以壽國者也先生夙喜余譚經爰述經學爲先生祝蓋古來致壽之方首在定慮次在養氣余嘗作仁壽鑑以發明之先生貌厚而神完志定而氣固小雅天保之詩曰天保定爾俾爾遐齡無不宜受天百祿古經之言壽者首推虞舜周文繼之者厥惟召康公其佐文武成康凡歷四代尙書康王之誥所稱太保卽康公也今讀書召誥篇曰節性惟日其邁節性者節嗜欲之性孟子所云君子不謂性也又考詩卷阿篇召公所作也其詞曰豈弟君子俾爾彌爾性彌性者充五常之性孟子所云君子不謂命也先生居恆寡嗜欲定心氣書君夷篇曰天壽平格朱注謂天無私壽惟至平通格於天者則壽之先生蓋當之無愧矣若夫重游泮水之喜更有爲先生頌者泮水之詩曰思樂泮水薄采其茹魯侯戾止永錫難老先生引掖後進中正和平非所謂載色載笑匪怒伊教者歟而闕宮篇則曰居常與許復周公之宇魯侯燕喜既多受祉黃髮兒齒先生前年曾獲兒齒之瑞豈非人開世之休徵微特吾鄉之榮譽也茲者普天同慶既復周公之宇矣先生杖履優游言旋言歸復我邦族人皆歎羨以爲神仙中人夷攷泮水之五章曰矯矯虎臣在泮獻猷此卽近世之武備學校也淑問如皋陶在泮猷囚此卽近世之法律學校也先生重游之時值國家全勝之會觀猷猷囚之喜度必有歆動於懷思振興武備而有以整飭之思修明法律而有以弼教之則所謂壽心以壽身壽鄉以壽國者庸有艾乎周易六十四卦之序畜德之後次以頤卦剛健篤實輝光日新其德而禮經所謂百歲期頤者先生當可操券而致也同鄉諸君子佳什璀璨騰光彬彬郁郁特陳下里巴人之語用殿鏗金瓊玉之後云

嘉定陳仲達先生行政練習序乙酉

政治學權輿於聖門論語子路一篇包括行政要領而顏淵篇先開其端聖人三答季康子之問其言曰政者正也子帥以正孰敢不正又曰苟子之不欲雖賞之不竊子欲善而民善矣皆寓本身作則之義而不欲尤爲大要故子路篇又曰苟正其身矣於從政乎何有後世爲民上者其能不欲乎其能正其身以正人乎儼皆能奉聖訓以爲法則國治而天下太平豈難致哉執友陳先生仲達篤奉聖門家法精研經史及近世政治學余長吾妻太屬中學時敦聘爲教師及學監諸生翕服奉爲圭臬歷有年所今春旋出宰太邑嘉定縣並任無錫縣縣長清廉公正有口皆碑去官後擔任復旦大學教授歷有年所今春以所著復旦政治學系行政練習講演集見眎屬爲弁言余受而讀之閱深肅括條理秩然而愛民之誠溢於言表不禁作而歎曰陳先生洵無愧於聖門矣論語言舉直錯諸枉則民服斯民也三代之所以直道而行也孟子紹其傳昌言曰民貴君輕而梁惠王一篇自古之人與民偕樂章以下屢言民字更僕難數夫天生民而樹之君蓋爲民經理萬事者也三代之世聖君賢相所以兢兢業業者無非欲得保乂吾民而已後世不知此義於是虐民殄民吸民之脂膏蹙民之生計吁此吾民之所以保抱攜持以哀籲天者也世之學者苟能體仲達之意研究政治常以愛民貴民保民爲心救民於水火之中則困苦者變而爲康甯憔悴者變而爲愉樂夫禮運大同之治豈空言所可緣飾哉竊願學者家置仲達先生行政練習一編而無忘救民之宗旨興孝興弟興仁興讓行見數年之後吾民皆鼓之舞之拜甘棠之嘉惠含和吐氣被福祉於無疆矣

嘉定陳仲達先生民國政治文選序丁亥

昔人有言知古不知今則爲腐儒知今不知古則爲俗吏故博古通今者尙焉書疏之學首推唐代陸宣公奏議其慈祥愷惻之感人雖武夫悍卒聞者莫不流涕宣公之所謂今卽後代之所謂古也余執友陳先生仲達乙酉歲有行政練習一書付梓其學說原本孔門余既讀而序之矣茲者復有纂述民國政治文選發

刊而探厥淵源蓋由研討宣公奏議而旁及之者自黎黃陂武昌起義訖段合肥執政下野遴選大事記諸文告可誦讀者若干篇加以按語燦若列眉使讀者渙然冰釋怡然理解洵難能而可貴者溯自民國肇造庶政事新不久軍閥放恣出入奴蠅蟾蜍幾與德唐德宗時藩鎮專橫無以異惟雲南討檄馬廠督師三代直道之公猶留於天壤吾輩飽眼滄桑由後溯前方策具在不至如杞宋不足徵陳先生學優而仕又復仕優而學凡後生小子皆當奉茲編爲知今之嚆矢矣抑余竊有進焉者先生自序引子思子行遠自邇登高自卑之說勉學者讀此編上溯及唐則以最高文格薪望吾黨友朋尤爲腕擊莊子云吾生也有涯知也無涯上庠之中多聰明傑出之士則取材施教由唐而更溯諸漢如賈長沙陳政事疏賈山至言董江都天人三策諸葛武侯出師表咸屬書疏濫觴爲日月不刊之作後之人師其意不泥其迹則得之矣奚必斷斷於今古哉

嘉興錢君海一辭辨序乙酉

余少讀李次青先生所編國朝先正事略心甚好之迨服官京師時先師嘉興沈子培先生語余此書蓋係吾同鄉錢侃石先生所編碑傳集作藍本余乃亟取碑傳集反復展玩更大好之厥後先師繆藝風先生編續碑傳集亦極詳備乙酉仲冬及門王君瓊仲以嘉興錢君海一所輯辭辨屬序余詳閱之其中有參於經學者如勿勿二字斷爲惠字亦勿之正晉引大戴禮曾子立事篇君子終身守此勿勿爲證考勿字本義說文訓作旃脚捲一角麾之以止三軍之進故論語顏子四勿視聽言動皆在外而四勿則守之在心也其有關於聲韻學者如伍員之員應讀如云引昆山顧亭林先生詩落日江頭送伍員秋風壘上別徐君員字不入先韻而入眞韻可見古人韻學之精審又如曹大家家字應讀若姑推之若室家國家等均應讀姑合於古韻余按詩鴟鴞篇予所掇茶予所蓄租予口卒瘁曰予未有室家以茶租瘠家協韻今吾蘇方言多有讀



家若姑實合於古韻也又款乃二字引元結款乃曲顏氏家訓及柳子厚漁翁詩爲證憶三十年前文治隨侍先大夫泛西湖每過小橋櫓中輒作款乃音乃知古人審音之精不必讀如襖襦也余嘗讀德清俞曲園先生春在堂隨筆輒以俗事加以古時考據如泰山石敢當齧齧齧之類皆以古事釋之淵博無涯瓊仲又示余錢文端公暨侃石警石兩先生事蹟蓋詩書考據之學累代相繼今海一君傳其遺學足徵文端公暨二石先生之澤源遠流長而曲園先生之學派亦有傳人矣因追溯文端公處全盛之時雍容揄揚作儒林之模楷噫其可羨矣夫

嘉興王君瓊仲文集序乙酉

人生當世氣節而已矣士大夫所負之責任激勵氣節而已矣氣節者氣骨也骨強則能擔揅負重而堅立於天地之間否則骨抱體柔遇事如煙之銷如火之威輕浮飄蕩社會隨之浮沉國家亦因以杞桎論語曰執德不宏信道不篤焉能爲有焉能爲亡天地間亦何貴乎有此等人哉何以矯之惟有氣節嘉興王君瓊仲於庚申年承先師沈子培先生之教來無錫國學專脩學校肄業察其貌溫溫然聆其言藹藹然挹其度淵淵然知其爲君子人也丁丑之歲日人入寇東南一隅不幸淪陷王君志節激昂不平之鳴時露於楮墨間顧其時日寇檢查密王君則以詩文稿藏於地板之下乙酉歲日寇降河山復故宇宙重光而君詩文遁顯於世本年季冬懇勸來請序於余余喜甚爰爲之序曰天地正大之氣雖當昏亂之時不容稍有泯滅昔孟子論養浩然之氣曰至大至剛塞於天地之間又曰其爲氣也配義與道宋文山先生宗之作正氣歌曰天地有正氣雜然賦流形於人曰浩然沛乎塞蒼冥後之人讀其歌覺其浩氣充滿於乾坤窮天地亙萬世成仁取義者皆奉爲矜式今王君始雖險遭不測而卽值昇平俯仰身世亦云幸矣然其際遇雖較古人爲幸而其責任則非較古人爲輕宋張橫渠先生有言爲天地立心爲生民立命立心立命惟主持氣節者足

以任之吾知王君自茲以往必能以氣節倡率天下不以皓皓之白蒙世之溫獲俾頑者廉懦者立舉近世貪鄙庸劣卑污醜醜之習一掃而空之如撥雲霧如滌塵埃此實國家之慶豈第吾門之光哉昔姚姬傳先生答魯絮非書謂接其人知爲君子矣讀其文非君子不能也蓋文行合一先儒所重王君之行清矯拔俗慷慨如不可犯讀其文者當知其爲君子人也余常勉人爲君子世皆笑以爲迂而余不顧蓋君子教育始於周文而大昌於孔孟讀論孟二經即可知其宗旨所在今時惟有奉君子爲法提倡君子教育吾國其有劣乎世有同志者讀王君之文自當欽其爲人而勉入於君子之林鹿鳴之詩曰視民不佻君子是則是攸卷阿之詩曰豈弟君子四方爲則吾知王君必益勉之而爲當世君子之楷模也

太倉季君調卿詩文集序丙戌

吾婁南郊有巨鎮焉曰南碼頭蓋自劉河潮流西注蜿蜒由陸渡橋趨半涇灣達城河以歸於太倉塘加以南渡桃花奚止千百樹莫春三月幽人逸士憑眺憩賞者累軌接踵地靈若此文煥焉成豐年間有季南阿先生諱敦詩者與先大夫同游於庠光緒六年有季君亦南諱福綬者與余同補博士弟子每屆學政按臨時歲科試必有南碼頭人列名其間文學之秀僉曰盛哉盛哉吾婁舊有婁東安道兩書院先師王文貞公紫翔先生嘗主講是二席惟時有南碼頭季君調卿文貞公之外甥也君發穎豎官師課榜發輒真然首列惜余其時肄業江陰南菁書院旋舉進士於京師未及與季君論文講藝光緒三十年嘉定秦佩鶴學士諱綬章督學閩省文貞公介季君入學幕司總校所拔多知名士僉曰懋哉懋哉厥後政體改革人情傾向共和號爲民主季君獨嘆曰彝倫如此數民智如此囂矣夫不揣其本而齊其末是猶適燕而南其轅也誤哉誤哉亟銷聲匿跡歸隱田廬不復與聞世事越數載遂歸道山同志之士莫不淒然灑淚曰惜哉惜哉歲次丙戌孟秋其猶子位東攜君詩文集來屬余爲序余展讀之多感喟時事之作而識見必衷於正理解必

歸於純信乎難能而可貴者也爰綜君平生學問事實序以歸之獨惜此文之成徵特先師不及見並不及與君討論商榷外感滄桑內維身世又豈不悲哉悲哉惟余有仿曾文正孫氏芻論序略附詳論讀慧言世弟所撰君傳文謂漢學之末流遂致用夷變夏未免太過漢學之長在訓詁名物如鄭君三禮注實係日月不刊之作漢宋學源流一貫不宜抑彼揚此君子之言平則致和激則召爭未可率爾陳辭也

上虞沈君思敏顏子傳略序丁亥

余嘗輯師四賢法曰顏曾思孟已刊入演講集爲多士修養之則已將十稔矣茲者陰陽棗輪亭毒胚胎陽動霞灰出坤入震適有上虞沈君思敏特詠曲阜顏子故官肖像暨手輯傳略與言行錄等成冊屬爲弁言余維古來尊顏子爲復聖者先儒謂孔子於易爲乾卦顏子於易爲復卦引初爻不遠復爲證其說遠矣余再廣義以推之繫辭傳曰復其見天地之心乎天地有起元來復之機人心亦應有剝極來復之會晚近以來人心放失貪污成風一點良知復於何有儻人能皆如顏子屢空安於陋巷簞瓢不必侈談天下歸仁與爲邦能羅四代禮樂則造成廉潔之風卽不遠復之初基也又按繫辭傳孔子贊顏子曰有不善未嘗不知知之未嘗復行此卽明代王陽明知行合一之宗旨余往昔曾著陽明學術發微印行於世有志之士儻能熟誦而心體之庶幾遠道不遠再聞昔年山東兵燹顏子廟頗受傷損現在想已恢復元祀矣通都大邑聖廟有鞠爲茂草者惟望振興文化之儒各出實力相與維持一綫珍碩錄而種來復之機也

泰興丁君素堂曾子學序丙戌

人生天地間孝而已矣爲人而不能孝則性情漸滅愛敬消除而乾坤或幾乎息矣吾讀大戴禮記曾子十篇最喜讀曾子疾病篇曰人生百年之中有疾病焉有老幼焉君子思其不可復者而先施焉親戚一指父母言一旣沒雖欲孝誰爲孝乎年既耆艾雖欲弟誰爲弟乎故孝有不及弟有不時其此之謂歟又最喜蔡

豈攀操轍曾子思親歸耕歌曰往而不反者年也逝而不可追者親也吁嗟兮歸耕歸耕乎此歷山盤兮豈  
豈明日即歸省其愛親思慕悱惻之情溢於言表可與蓼莪鴛鴦陟岵詩並昭垂於天地之間讀之而不  
動孝思者非人也詩曰永言孝思孝思維則孝思以何爲則法曾子而已矣孟子言大孝終身慕父母余嘗  
作大義三篇以表矜式蓋自古大孝遠而在上者曰虞舜隱而在下者惟曾子余於昔年作曾子大義先以  
孝經次探論語孟子大小戴禮記羣經並諸子中引曾子之言都萃其中而藁本爲福建葉君長青攜去不  
數年葉君歸道山原稿訪求不可得矣及門泰興丁君素堂孝悌中人也余請其爲國學專修學校諸生講  
授孝經聞其訓言有感動流涕者可徵孟子性善之訓實從至性中流露而出也今歲素堂以曾子學一卷  
見畧余讀之愛不忍置惟望素堂以講授於本校者推之於一鄉一邑而即達之於一國未有仁而遺其親  
未有義而後其君忠孝之詣漸漬於人心良知良能達之天下擴而充之以保四海其裨益於國民豈淺鮮  
哉豈淺鮮哉

崇明沈君汝梅適處叢稿序 戊子

歲次戊子季春崇明沈君同一將其鄉先哲沈君汝梅適處叢稿來徵序於余受而讀之共分四部曰詩曰  
文曰筆記曰雜俎其精要概略一曰修養身心二曰人倫道德三曰教育政治之評騭四曰人心風俗之匡  
維五曰時事諷刺及一事一物寓有藝術深味者編次以年歲先後爲序嘆其用意之明爽莫與儔也昔劉  
彥和文心雕龍曰文之爲德大矣實與天地並生又曰言之文也天地之心哉蓋人莫不具仁義禮智之性  
感而遂通天下之故則發而爲喜怒哀樂之情聖賢保合太和範之以樂律趨以采齊行以肆夏其涵養德  
性至矣故曰大樂與天地同和迨秦政燔書樂經遂亡於是感動人心者遂託之於詩文易傳曰聖人感人  
心而天下和平握其要端天理民彝皆顯於倫常日用蘊之爲孝弟擴之爲仁義孝經感應章曰孝弟之至

通於神明光於四海神明者言通本心神明之德也聖門四教文行忠信首之以文者行忠信之宏綱大用皆載於文也今沈君是稿先以涵養身心古聖人注重躬行之道也次以人倫道德古聖人敦崇孝弟之意也其辭雖淺顯而其指則深遠洵有味哉余昔年曾編國文大義與古人論文大義國文經緯貫通大義三種首重文行合一以爲凡文之博大昌明者必其人光明磊落者也文之精深堅卓者必其人忠厚篤實者也惟天下第一等人適能爲天下第一等文反是則其文不足存其人卽不足道沈君所持宗旨與余嚮所見不謀而合昔姚姬傳先生言接其人知爲君子讀其文非君子不能也又謂誦其文諷其言則凡人之性情舉以殊焉可見人文合一之致古人蚤發明之矣崇明本我鄉邑代有聞人近惟我執友王文恪公旦揆先生著有農隱廬集問世今君之適廬叢稿可與並傳不朽矣抑又思之適者適意之謂也吾人講學與道大適動合天機則凡世俗之貪鄙心自私心俱一掃而空之其於世道人心詎不大有裨益哉爰書所見闡明文章本原根於品行質之於君當不河漢斯言

孟子救世編自序丁亥

救世以何爲要讀經而已矣讀經以何爲要先讀孟子而已矣昔司馬子長作孟荀傳敘騶衍闕大不經之說謂中國名曰赤縣神州禹之序九州是也不得謂爲州數中國外如赤縣神州者九乃所謂九州而子長先提其端曰余讀孟子書至梁惠王問何以利吾國未嘗不廢書而歎也曰嗟乎利誠亂之始也後世儒者或驚怖其言或迂遠其論不知是乃子長之特識也二千餘年後歐美兩州發現大九州之說固有明徵矣愚嘗乘輪舶泛裨海馳鐵道走大途抵英法美諸國都磔格之語象寄之倫雜列於吾前爭欲詢吾國聖賢之彝訓詩書之根本廉恥名教之大坊余常告以孟子仁義之說雖舌人淺道而彼都人士多頹首會意若不勝其歆羨者孟子道性善東海西海心理皆同豈非具有明驗哉迨反觀吾國則廢經不讀而好利之弊

什伯倍於曩時孟子所謂後義先利不奪不壓上下交征利於斯爲極不遺親不後君忠孝大節炳若日星  
瞻其能深體而躬行之哉嗚呼可慨矣夫利字本義刃植其旁縱欲濫取怙勢強奪必至自殺孟子曰吾今  
而後知殺人親之重余爲轉一解曰殺人之子孫人亦殺其子孫而本心昏昧者沈溺其中卒莫之悟嗚呼  
可痛矣夫爰不揣弁陋做朱子纂孟子要略之例編爲十類曰孝弟學曰尊孔學曰貴民學曰心性學曰政  
治學曰教育學曰氣節學曰雄辯學曰論戰學曰周易學而於養平旦之氣葆其良知良能由愛親敬長達  
之天下尤不憚苦口疾呼三致意焉夫奮乎百世之上百世之下聞者莫不興起非我所敢期也若夫閑聖  
道正人心息邪說經正民興則余嚮所服習者不敢不自勉而並以勉人也江陰孫君壽熙甯波縵君天行  
受業於余讀是書尤好之爲出賃印行深可感也

### 三民圖書公司廿年紀念刊序乙酉

人生當世修養道德激勵氣節而已矣周易泰卦之彖傳曰君子道長小人道消否卦反是則曰小人道長  
君子道消余常謂求國家永久之太平非提倡君子教育不可論語一經載君子凡百有五處其以君子小  
人對言者有四十餘處最要者曰君子喻於義小人喻於利又曰君子上達小人下達蓋喻義則志氣日益  
宏而漸進於高明喻利則志氣日益卑而漸趨於汙下上達下達卽判於此而風俗之所以盛衰厚薄國家  
之所以廢興存亡卽係於此豈不重且大哉然而縱橫億萬里上下數千年大率君子少小人多而操用人  
之柄者亦如適燕南轅駘有得當豈果無其人哉道德不修氣節不立之所致也余嘗讀乾坤正氣集正誼  
堂全書及唐宋元明氣節諸賢遺書文集往往高山景行俯仰流連而不能已然苦無易簡專家之集便於  
學士誦讀而措諸躬行者亦社會中遺憾事也同鄉吳生拯寰爲余同學中特出之士講求氣節特立不撓  
民國十四年四月創辦三民圖書公司迭印抗日救國圖書追事變後敵人檢得之怒甚索主筆者遂於三

十三年四月某日橫遭逮捕拯我毅然挺身往蹇蹇侃侃一無所屈敵人亦敬異之即以囚車送之歸嗟乎拯我可謂凜然正氣能配義與道者矣周易大過之彖傳曰獨立不懼孟子曰威武不能屈其在斯人歟其平居所印書籍若正義教科書青年修養服務叢書胥關於砥勵志節持躬涉世之要道又增訂古文觀止增輯清代忠義節烈之文宜揚中華民族正氣都凡一百八十餘篇又輯歷史古事附以圖畫選擇民族英雄二十人圖文對照俾初學童子培植名節根柢激昂愛國精神又蒐集扶持正義之文編補習學校課本使工商界失學青年悅心研慮或作爲夜校講本其矣其用力之勤也繼自今以往聞其將編輯建設專書包含心理倫理政治社會經濟各種俱印行之又承印各地文獻諸籍藉以發潛聞幽流傳掌故余維大難截平不乏忠義殉節之士亟待表彰按從前粵匪之難吾鄉先哲嘗刻太鎮忠義姓氏錄日月不刊拯我猶此意也各省各邑宜踵爲之用昭志乘之光夷考其所刊廿年內容分經學政治經濟法律教育科學文藝醫學各門類將以餉遺多士則更有默契余心者夫經籍吾國之寶筏也世未有蔑棄其國粹而可以立國者余曾於讀經管見中論之並詳列讀法拯我諸君儻不以余言爲迂而盡力提倡之吾國庶幾有考矣夫

讀經月刊序丁亥

昔曾子有言君子以文會友以友輔仁說者謂指文學家言余謂不然太史公撰貨殖傳云子敬學於仲尼廢著鬻財於曹魯之間七十子之徒賜最爲饒蓋端木以言語之科而究心實業連騎結駟得勢益彰是學與商同條共貫者也余前掌商部時提倡組織商會等崇商業道德而沙溪濟泰紗廠方始萌芽余嘗扶翊左右其間人事滄桑工業之磨礱亦因之而演進方今利泰紗廠爲吾婁工業最大之鉅型業務蒸蒸日上職工達二千餘人以維持生活者萬餘人此皆由經理各大股東暨在廠各執事同心協力殫精殫盡有以致此吾邑瘠苦之區賴茲救濟誠盛事也歲躋丁亥仲冬及門陸生博泉貽書來告曰利泰紗廠諸君近有

聯誼會組織規約業餘時間聯絡附屬機構人才研討學術維繫情感并注重鍛鍊軀幹鼓舞正大娛樂爲一鄉一邑倡將以進益所得彙爲月刊而工務長周仲溥先生當仁不讓見義勇爲尤經商而好學者爲序言以樹風聲余適作而嘆曰宜聖有言志道據德依仁游藝禮記學記篇曰藏焉修焉息焉遊焉凡人乘天地清明之氣終日熙來攘往耳目所接觸者形形色色思慮之雜焉得屏除惟有學術以涵養之蓋譬以切磋之然後德業日新精進無疆大戴記曰與君子游如長日加益而不自知又曰如入芝蘭之室久而不聞其芳則與之俱化茲者聯誼會之擬設聲相應氣相求有裨於風俗人心豈淺鮮哉抑余更有進焉者技能國之寶也心性國之基也尙技能則可以富國而療貧尊心性則可以強國而祛弱故修己治人之方宜先讀孝經次及論語孟子最爲深切是故讀經可以救國卜氏子有言百工居肆以成其事君子學以致其道入皆謂早嘗而喻余則謂百工居肆者皆致道之君子也夫十步之內必有芳草十室之邑必有忠信主忠信一語論語凡三見吾鄉自陸陳諸先生提倡風教俗尙敦朴諸同人能守忠信二字爲經商之大本行見事業與風俗與時俱進企予望之矣

伉儷月刊小序 一丁亥

或問伉儷至情何人爲最曰莫如虞舜或曰嘻先生好古亦甚矣何至上述大舜曰據尙書釐降二女於媯汭言舜爲天子二女嫜而禮載舜葬蒼梧之野二妃未之從於是哭之慟絕淚痕凝黃竹唐韓昌黎祭張員外文云南上湘水二妃行迷淚蹤染林古者三十而娶舜壽百有十歲度二妃亦已百歲乃至情至性若此湘妃竹淚痕至億萬年猶存然則伉儷之敦篤孰有過於二妃者乎大舜刑于之化亦可見矣迄於後世輕於合者輕於離而夫婦之道苦於是有谷風之詩載於葩經矣

伉儷月刊小序 二丁亥



唐杜工部佳人一詩全胚胎於谷風詩幽居在空谷卽谷風也夫嬌輕薄兒新人美如玉但見新人笑那聞舊人哭卽所謂誰謂荼苦其甘如齊宴爾新婚如兄如弟也在山泉水清出山泉水濁卽所謂涇以渭濁湜湜其沚也侍婢賣珠回牽蘿補茅屋卽所謂我有旨蓄亦以御冬也摘花不插鬢采拍動盈匊采綠詩所謂終朝采綠不盈一匊也天寒翠袖薄日暮倚脩竹綠衣詩所謂絺兮綌兮淒其以風也彼伉儷乖戾者誦之當感動而涕零矣他如伯兮詩自伯之東首如飛蓬豈無膏沐誰適爲容中谷詩有女仳離條其嘯矣遇人之不淑矣其語皆極痛心故曰溫柔敦厚詩教也惟讀經之君子乃能立家庭之模範

高君踐四傳跋丁亥

余及門無錫高君踐四諱陽承其尊人秋荃先生遺志毀家興學並其家藏所有股票悉數售充學費余於民國十年創辦私立無錫中學開校之日踐四痛述先人志事並謂吾先人不及見唐先生面託肇興錫邑文化云云言次慟哭流涕不能自己一時聞者莫不感動此眞興孝之效也民國二十七年丁丑歲日寇內燬余倉皇由無錫出走踐四來送黯然潛然若不勝其悲者余旋遷長沙又轉湘鄉與踐四消息隔絕翌年夏余由桂林回滬乃不久聞踐四已歸道山又聞其貧窶甚居古廟中有人欲飲助之踐四不受以無力入醫院竟死廟中臨歿時僅一老僕侍側而已傷心哉踐四以興學而家業蕩然且清廉自矢竟至死古廟中純孝廉節無愧完人余聞其噩耗爲鬱伊者數日夫聞潛德之幽光是吾儒之貴也爰紀其事聞其風者其可廉頑立懦矣夫

茹經堂文集六編目錄

卷五 傳記類

太倉陸勤之先生家傳戊子

臨川黃穉棠先生家傳丁亥

平湖趙春培先生家傳丙戌

崇明陸才甫先生家傳戊子

無錫戈仲翔先生家傳戊子

無錫朱福明先生家傳丁亥

江陰徐邦基先生家傳丙戌

江陰邵詠唐先生家傳丁亥

無錫李晴村先生家傳戊子

永康呂月軒先生家傳丁亥

無錫王君翰仙家傳丁亥

嘉定胡君春臺家傳丙戌

武進沈耀廷先生暨德配汪夫人合傳丁亥

江陰沈源興先生暨德配謝夫人合傳丁亥

上海黃雲僧先生生傳丁亥

武進張惟鱗先生生傳丁亥

太倉孝貞女陳氏生傳乙卯

崇明龔母沈太夫人家傳丙戌

丹陽姜母姚太夫人家傳丙戌

廣西平南歐陽謝太宜人家傳丙戌

宜興陸母吳夫人家傳戊子

海門王母杜孺人家傳丙戌

無錫王劍秋夫婦母女殉難記丙戌

無錫王淑靖孝女割股療親奇驗記丁亥

無錫二泉橋記丙戌

無錫許氏三畏堂記丁亥

上海交通大學文治堂行奠基禮記丁亥

上海永康中學增建思齊齋記丁亥

無錫辟疆園移寶金匱山記丁亥

海濱續修輿圖記戊子

義馬記乙酉

# 茹經堂文集六編卷五

太倉唐文治蔚芝著

## 傳記類

太倉陸勤之先生家傳戊子

歲次戊子二月十六日太倉姻世執友陸勤之先生以舌瘡證卒於里第先生性仁慈樂善施與不倦鄉人被其澤者相與奔走巷哭余聞噩耗亦不禁恫心揮淚曰嗚呼失一師資矣蓋吾鄉自陸陳江盛四先生講學以來風氣純樸人心敦厚遠近延師者莫不取資於吾婁因之四方之稔先生名者亦痛惜曰失一師資矣先生諱曾業勤之其字後改名起先生本吾鄉望族八世祖諱毅以名進士官監察御史巡視中東兩城丰裁嚴整不阿權貴有自撰巡城瑣記曾祖諱元文字子鐵嘉慶癸酉順天舉人著有練齋詩稿祖諱恩藻考諱汝梅均太學生代有積德先生爲本生考成甫公諱勸次子天性至孝事親先意承志母徐太孺人病革封臂籲天調藥以進稍效後卒不起先生大慟曰天不許我報罔極恩耶先生年踰弱冠遊於庠旋食廩領舉優行先受業於李先生伯豫王先生晉蕃嗣又受業於同邑王文貞公之門文思大進聲譽鵲起乃應秋闈屢薦不售諸鄉老咸爲太息平居見義勇爲親族中有貧乏者瞻養之惟恐不及民國初年先生往遊冀北天津白河泛濫大浸稽天先生晝夜跋涉跣足行水中力救難民江浙齊盧之戰吾鄉瀏河當其衝炮火所及玉石俱焚先生奔走號呼籌款築室以庇鄉人全活藁衆至今猶有感念之者居北京時先生入法政大學肄業昕夕劬學浸至咯血入醫院維時余官京師勸其少息適輟學而錢塘施植之先生延攬先生佐理哈爾濱道署事閱三載余方監督南洋大學以庶務科長需才甚急特三次電招先生來校而先生亦

以思親彌切幡然南歸就職余倚之如左右手焉民國肇造五路恢張而隴海路綫尤長督辦施省之先生亟招先生佐理其事先生又襄路務者數年旋以積勞體屏急急思歸惟時余與省之先生創辦國學專修學校延先生爲總幹事締造艱辛倚畀益重而先生往來於婁江滬濱之間又幾閱寒暑旋浩然歸隱築室於邑之鮎魚墩蒔花栽竹無意問世矣先生初以繼室施孺人逝世悼亡伊鬱肝火上炎遂患舌病時發時止初不介意詎歷二十年竟成舌癌證先後入上海鑄錠醫院及中山醫院療治已稍稍愈矣無何節屆春分夙疾大作遂爾作古天奪善人傷哉憶往者余同鄉畢君枕梅嘗曰凡人所不能爲者惟陸君能爲之且高尚廉潔豈常人所能及武進莊君思緘與先生共事嘆服曰若陸君者可謂先之勞之且能無倦綜二君之言可以概先生之平生矣先生以清同治丁卯年七月二十六日生民國三十七年國曆三月二十六日卒春秋八十有二去歲丁亥重游泮水元配胡孺人繼配施孺人均有賢德先生卒二雍伯公項太孺人女也長適吳震驤次諱巧蔭未字年十九以貞烈投水死得旌表如例余嘗爲文以哀之本生兄弟四長諱修爵三諱修瀛四修祐姊妹三長適錢雨田次適王熾甫三適朱子久子二長慶熙供職上海中央銀行娶同里太原王氏次慶祺供職上海閘北水電公司女慶蘭爲余第四子慶永婦孫二樹孫崧孫孫女兩門庭之內賢孝可風先生之食報宜哉

論曰余初聞先生歸道山念六十載交情不覺霑襟之浪浪也既而思之曰可無遺憾矣往者讀書洪範篇怪其敘五福自壽富以迄考終不及子孫之賢若先生之一門孝弟可補洪範之缺矣孝子不匱永錫爾類君子萬年永錫祚胤特援引詩篇以慰幽靈於地下卽爲其哲嗣文孫最焉

臨川黃稗棠先生家傳丁亥

先生諱鴻圖字咸和號稗棠江西臨川縣人其先世子玖公當宋末避亂遷居於邑之北鄉湖西村爲湖西

黃族權輿又十二傳曰懷西公再傳曰勵堂公三傳曰海瀾公代有積德曾祖諱某字晴嵐性仁慈喜施與祖諱垂烈字芳揚妣游氏考諱樹敏字棠村清同治壬戌科舉人任弋陽萍鄉餘干等縣訓導教士有方妣帥氏棠村公生子四曰彼棠曰次棠曰幼棠先生其季名曰穉棠幼天性敦篤聰明岐嶷年七齡隨侍棠村公受書於弋陽訓導署溫恭孝謹能守曲禮訓昏定晨省無失儀迨十四歲十三經畢業尤好四子書朱子集注均能背誦頗能以切實躬行爲志長老咸器重之年十七德配邱定宜人來歸越三年先生弱冠應童子試獲薦取入府學歲壬寅食鳳嶺旋就撫郡師範學堂之聘方是時學說龐雜學子靡所適從先生立意立品勵行毋入歧途歲己酉拔萃於鄉次年庚戌獲選七品小京官分陸軍軍計司議罰科旋調郵傳部承政應考績科厥後遭家不造雁行零落折翼似續之事頗費周章卒奉棠村公命以讓泰爲冢嗣於是宗公有定位矣初棠村公教授生徒不務帖括學惟以通經致用爲宗旨比時督課子姪及諸甥輩壹以熟讀經書砥礪品行爲先務之急可謂知本矣禮曰尊祖故敬宗敬宗故收族先生孝行充積於中歲庚子考樹敏公乘養甲辰妣帥太夫人見背先生擗踊欲絕居喪不聞樂不與宴午夜思親恆伏枕痛哭悲不可仰如是者歷有年又聞堂上病爲醫所誤因思程子爲人子者不可不知醫其言最有精理因研究醫學參九藏之動每值朔望誕忌諸辰必齋戒沐浴躬親簋豆歧其如在之誠日記言君子有終身之喪忌日之謂也可不謹乎臨沒之前六日爲七月五日適逢母帥太夫人忌辰先生臨祭痛哭流涕病因之加劇屬纊之前猶哽咽詔譔泰等曰天地之間惟人爲大全受全歸之義惟以繼志述事匡濟時艱爲最重要之事若夫慎終追遠敦睦九族尤爲立身處世之根本其勉之哉本支祖懷西公祠宇失慎先生爲重建之玄祖勵堂公祠宇傾圯先生爲修葺之寒暑風雨督工罔懈洎工告訖功先生心始稍慰又擴親親之恩於大二三五姊若妹之喪躬自泣奠撫其後嗣其敦手足誼如此其他濟困扶危之舉更不可殫紀也且夫士生今世孝弟而已

矣氣節而已矣孝弟所以培氣節之基而氣節所以推孝弟之用處今日而不知激勵氣節則萎然恭然何以屹立於天地之間先生純孝既如上所述倫紀之間靡所缺憾平居尤喜誦武侯出師表張睢陽李忠定文信國楊忠愍史忠正諸忠臣烈士傳而於信國正氣歌忠正致清齋親王書則更往復流連吟誦悲歌不能自已嗚呼此誠發於天性者耶余嘗謂天下惟真性情中人乃能立真氣節既於先生見之矣先生居恆治經不分漢宋門戶惟以實事求是爲歸金石篆隸亦喜研究臨摩據德游藝優游彌性洵無間然退隱後又復勤恤民隱孜孜樂善如先後修築堤工又以族姓殷繁建設義倉以廣贍養主郡中教育端飭師範詰盜安良捍衛閭里凡屬諸端均難能而可貴者既歿之後鄉人私謚曰貞孝可知其內行之純篤矣先生以清光緒六年五月十三日生民國二十幾年庚辰七月十一日卒春秋六十有一配邱宜人繼舒宜人子七人諱泰謨沁謨讓謨熙謨丕均存又謨毅庚年早夭女六人萃馨萃馨早夭餘均適望族孫男五人孫女三人論曰謨泰謨沁余及門弟子也其在國學專修學校肄業時溫乎其貌遽乎其志懇懇乎好學而罔懈蓋先生之遺型未墜也先生之德行余特爲表章之記曰善繼人志善述人事而其志與事則當傳嬗於無窮謨泰諸昆季固當守茲勿替而世之聞先生之風者尙亦勉之哉

平湖趙存培先生家傳丙戌

歲丙戌孟冬月及門趙生欽一持狀來請曰舊歷十月十七日爲吾父殉難之期忽忽已屆九周矣戴天之恥失怙之悲鬱結不敢忘敢乞先生一言爲傳庶吾父之慘死於生前者或可移穆愉於地下乎言之潛然余深嘉其志之孝而哀其言之悲也案其狀則又肅然起敬曰世之殉難以死者已不易得矧義烈壯節正大之氣萃於一門者乎是烏可以無傳先生諱春培字寅桃別字營堂浙江平湖縣籍其先世爲宋太祖次子燕王德昭之後遞傳至元初文簡公孟堅學士結廬當湖遂家於斯祖考翠谷公諱爲植清太學生居恆

讀書勵行恪祀祖先戒子孫以無忝所生爲訓清咸豐十年粵匪竄浙先生於七月十五日遇變殉國難其繼配張氏亦並殉焉其元配高氏高文恪公江邨尙書五世孫女考少閣公諱廷燮年十二遇寇被虜於杭州乘間得脫輾轉流徙行乞爲傭得不死妣金氏豈憐慈祥族黨稱之寅桃先生昆弟四人仲弟諱夏培字已柳庚申之變前先生一日被難妹襄羸適同邑時孔昭十八年己卯日寇鴟張襄羸從事地下工作以事洩遭寇難嗚呼前乎先生者若斯後乎先生者亦若斯眞壯烈矣哉平湖自陸清獻提倡正學敦崇氣節三百餘年流風未沫先生則倣前賢清介自守丁丑十月十六日敵寇自杭州灣登陸長驅入平湖先生初避鄉間未之知也翌晨自鄉返城遇敵被執迫脅爲鄉導先生怒叱之敵憤甚橫加鞭撻并搜得腰藏日記多載敵愾語遂以利刃斫之死狀極慘嗚呼尤壯烈矣哉先生少時受業於先賢高文恪公裔孫闡如先生之門繼畢業於平湖師範講習所歷任競新裘莊國民學校校長新倉區高等國民學校校長並任教稚川學校詒穀女子中學及上海嚴氏公學又結尊古社陶情社協纂平湖經籍志著有音注表詩鐘格各一卷曾任浙省昆蟲局治蟲督察員臨海縣國民會議選舉監督公署特派員復充永康縣土地陳報處主任小試其才未獲大用性曠達不求仕進恆以詩酒自娛雖屢空晏如也德配費夫人有賢德子五長欽一肄業無錫國學專修學校旋入中央軍官學校欽二礪欽三習商業欽復欽隨俱礪女三欽仁早礪欽伍待字欽介蚤卒余維孔曰成仁孟曰取義讀聖賢書養氣節而已矣輕死不可也臨難逃避更不可也明浙省蕺山劉念臺先生著三關曰人已關曰義利關曰生死關且謂破生死關最難余之所以傳先生者以其死事之勇爲不可及也禮曰臨財毋苟得臨難毋苟免惟清操不苟得之人始能果決於一死貪鄙之徒坐擁厚貲官室之美妻妾之奉久已失其本心詎能無苟免乎如先生者可以風世矣欽一爲累代節義之子孫又沐前賢清獻之風修身立品之道當聞之熟矣尙其勉之哉



## 崇明陸才甫先生家傳戊子

先聖嘆善人不可得而見而於爲邦教民必歸諸善人又與端木子論鄉人之好惡則曰不如鄉人之善者好之其不善者惡之余常欲求鄉里善人以爲一方矜式戊子春正譜姪王君誠僑攜崇明同鄉陸才甫先生事略來請爲家傳余讀之爲起敬曰余向所謂善人先生其庶幾焉先生諱家嘉字才甫江蘇崇明縣人先世惠尊公自句容遷崇習武事有官勳五傳至先生考西垣公蘊藉工文章聞望達畿序間不幸幼學蚤世士林惜之西垣公生三子長家鼎留日得農學士次卽先生三家駒留美得工學士先生幼時遭家不造年十三失怙喪長丁母倪太夫人憂楚楚在疚誦詩至蓼莪我及閔予小子諸篇未嘗不流涕願其志氣益踴厲風發膏欲以他國之長補我國所短發憤留學東瀛習法政殫精攻苦閱四載得政治學士學位歸赴部應試中孝廉任譯學館教習踰年廷試列前茅授縣令分發浙江省大吏重其才能時延見垂詢財政暨司法諸要端先生獻可替否悉中機宜方是時世界元黃中原鼎沸先生蒿目時艱亟掛冠歸辛亥政變人權幾無保障先生慨然曰宋張子有言民吾同胞非有法律以範圍之則弱肉強食乾坤或幾乎息於是本春秋之大義揭律師制度成書上政府當道體之往來蘇滬間任律師職辨護俱達民情或以苞苴進則嚴斥之又主任金閩海坊法政學校教務爲諸生導揚法律作之模範代議制立先生被舉蘇省議會議員繼膺參中兩院議員之選矯矯亢亢不事詭隨任省議員時有藉鹽壟公司霸佔民產者有影射紗產名義濫發鈔幣者人皆側目不敢言先生不畏強禦據理力爭卒寢其事此以法律掾人者一先生在滬時任律師公會執委有某氏讀書謚愿租界捕房恃外邦勢力鍛鍊周內誣繫榜掠瀕死者數先生仗義執言昭雪出諸犴狴而酷吏奸胥之肆虐者皆科以反坐罪此以法律掾人者二日寇內燬麗閣於天先生杜門輟晦大節凜然勝利後人事漸明矣而當崇邑絕續之交奸匪伺隙蠢動攻城略地七邑時驚事定鄉人有誤涉嫌疑

者被誣極夥家屬呼籲無門先生愀然曰彼無辜者忍令其沈孽海耶白於有司一日而得釋者百餘人歎聲遍閭閻此以法律求人者三國庫空虛政府乃頒糧賦徵實令崇邑係濱海斥鹵農產求過於供不克負荷時先生患喘體羸扶病督省力陳利害議遂寢此以法律求人者四總先生平生曾辟爲地方檢察廳長却徵任律師事又歷任財政司法兩部祕書外交及魯案委員會委員取與必謹爲羣僚法式胡期天不憖遺喪我善人惜哉惜哉先生以清光緒十一年十月二十日生民國三十七年正月一日卒春秋六十有四德配蘇夫人先卒繼某夫人子一頌威尙幼爲善有後企予望之矣

無錫戈仲翔先生家傳戊子

歲次戊子春余僑居滬濱錫邑友人戈君淵亮字子才來請曰先考仲翔公之歿距今四十年矣平生德性淵懿沈毅昭昭在人耳目而刻鏤不孝之心膺深懼湮沒不彰則罪戾滋重謹齎事略敦請椽筆爲傳藉垂不朽余受而讀之歎曰宣聖歎善人不易見若仲翔先生者洵不愧爲善人矣按先生諱明峻仲翔其字江蘇無錫縣籍祖考諱德孚考諱曉榮國學生先生天性孝友幼時遭洪楊厄隨親避難江北毗離艱苦亂平歸里幸屋廬無恙佐曉榮公適宜適畝適理適疆田疇於以恢擴舊歲入七八百畝家道小康比長專師武侯之謹慎深自韜晦不事表曝令聞望達於一鄉邑宰稔其賢能鄉里服其貞幹羣相推引請其董正一方先生堅辭不就而於地方善舉當仁不讓皆隱行其實不居其名每值隆冬改歲之時輒惻惻若有思人間之則蹙然曰詩言無衣無褐何以卒歲孟子云飢餓不能出門戶栗烈若斯貧民何以度歲於是潛行鄉

曲間至丙夜不倦寒者衣之餓者食之此豈非古人已飢已溺之德量歟至於三黨九族之無依者隣里有貧戶不能舉火者輒詳詢其所以致貧之由非四支懈惰兼有嗜好者均一一調恤之可謂仁至而義盡矣若夫婚嫁喪葬無力舉行者任恤亦如之天地之大人猶有憾惟水旱凶荒爲甚故盡力溝洫功德最鉅先生宅居荅湖五瀉壩稔知水利農田惟隄防是賴爰斥巨貲督修龍塘隄周家隄北浪隄捷之春之瘞之築之用是歲占大有樂利無疆附近居民僉歌詠曰此仲翔先生之德也口碑因以傳誦焉又以餘力興修八卦橋滋德橋懷陵橋百子橋工告訖功民不病涉此皆有關公益之大者至如表章先德則建宗祠敦睦族誼則修譜牒恩逮黎庶則辦平糶培植後進則興學校其居恆忠信篤敬常書諸紳與子言孝與弟言恭動用周旋壹以禮經爲則徵獨鄉里內之典型抑亦藝林之模範矣先生以某年某月某日生某年某月某日卒春秋五十有五元配趙夫人均有賢德子二淵亮淵晏王出恢復先業中華染織廠暨元大煤油公司有孝有德克世其家事王母某太夫人盡含飴之樂享壽九十二歲而終女六長適署四川榮昌縣顧鴻遠大適嚴麗甫三未字四適朱晉範五適嚴德軒均趙出六適高鏡秋王出孫幾孫女幾門楣光大可前知已論曰書言聰聰祖考彝訓詩言孝子不匱永錫爾類其類維何室家之畫凡人家庭所難得者不在富貴赫奕而在子孫繩武續戎善繼善述則畫史有光榮矣余與先生哲嗣子才君爲毗鄰稔知其芝蘭玉樹秩秩溫溫且篤守前型樂善不倦他日門第崇隆可限量哉向例凡鄉里有善行者即可載諸志乘爰記仲翔先生之行詣俾先編諸畫史云

無錫朱福明先生家傳丁亥

先生諱福明字錫章江蘇無錫縣人世居邑之北鄉雙河曾祖諱某祖諱某考諱某子姓繁衍爲紫陽望族其哲嗣廷墀廷烈介余宗姪涖源持狀來請爲傳計距先生之歿忽忽已十年矣涖源夙與其子若孫相知

爰述其累世積善之功太和洋溢施及後昆振振公子有壬有林雖遇習坎重險而邁往貞固之精神實足以承先而啓後然後知修德獲報之說爲不爽也先生少時食貧輟讀隨篙師操舟爲業苦心志餓體膚安之若素每慨然曰吾氣骨得所磨鍊矣暇輒閱古來忠孝節義傳記怡然理解求所以爲人之道識者歎爲具有夙慧有清之季海禁宏開萬物隸通商業萌芽伊始中國則倣泰西製造品日新月異先生沈幾觀變於光緒甲辰創建裕康貨號於邑之北大街爲發展權輿與不數年營業丕著又掀福綸襪廠於邑之西城脚裕康襪廠於邑之厚德里榮乎隱隱各得其所工人賴以維持生活者無慮數千人厥後天產札商品棄滋蕃人工造作供不應求爰於民國二十四年在邑之吳橋盛岸浜購地鳩工庀材擴充爲裕康電機針織廠屋宇鱗次櫛比杼柚駢陳馳電掣規模益宏遠矣懋遷之廣無遠弗屆惟是先生經營事業固屬商戰英雄而先生之宅心行善尤有不可及者吾錫紅卣會溥仁會爲當地最大慈善機關余於昔年呼籲各省災荒罔不立應而先生自周甲後以廠務屬兒輩入爲會員立意靜修古人所謂爰清爰靜守德之宅先生默斯旨矣自是厥後益致力於博濟散財發粟惠恤災黎樂而不倦由是紅溥兩會巨壇奉濟祖訓錫子曰惠潤時人交稱之以爲寵榮昔宋朱子爲同安主簿有放賑詩云若知赤子原無罪合有人間父母心惻怛慈祥溢於肺腑先生之爲善其報本於先正之典型歟至於掩骼埋胔既澤枯骨又益衛生尤足欽焉平居處世以誠待人以寬律己以嚴齊家以儉勤常誦朱伯廬先生家訓爲座右銘鄉人有爭執則必訴諸先生以俟判斷皆悅服而去其善言善行更僕難數丁丑事變先生挈難友以行者百餘人衣食賴之漢陽風鶴播遷宜昌是年先生七十有一痛家國之阨危哀民生之憔悴倥傯抑鬱因以得疾遽沒於宜昌途次天喪善人傷哉先生以清某年某月某日生民國二十六年某年某月某日卒德配沈夫人夙具賢德治家有法度子二長廷墀次廷烈能繼志述事不揚前烈喪亂既平在滬戈登路恢復錫邑裕康電機針織廠申廠復組

織振興紡織廠於錫邑裕康廠原址揆張實業擴而充之先生可穆愉於九京矣廷墀娶趙氏廷烈娶周氏女三長適郁蚤卒次適孫三適嚴孫五人如水如鏡如蓮如淵如楠均嶄然見頭角孫女二雅璽望璫蘭玉森森一門鼎盛余常謂居今之世乃爲善大好時機惟望廷墀廷烈昆仲益勉於行善恢胞與之仁懷守先人之彝訓他時寢熾寢昌罔有涯涘猶不僅目前之發達而已也詩曰貽厥孫謀以燕翼子所謀維何享享爲善而已爰傳先生之行詣更爲賢子若孫勗焉

江陰徐邦基先生家傳丙戌

人之所以見重於社會者仁而已矣信而已矣仁信交孚遐邇靡聞於是鄉里奉爲典型子孫卜其昌熾非偶然也吾謂徐先生邦基可以當之矣先生諱志根邦基其字江蘇江陰縣籍曾祖諱某祖諱某考諱嘉言世有隱德妣夏太夫人賢而有能嘉言先生於清咸同時遭粵匪之難攜槍經天戈鏖滿地風餐露宿飢渴顛踣辛苦艱難備嘗之矣亂平後夏太夫人來歸誕生邦基先生自幼聰穎出就外傳讀四子書了解大義目數行下孝行尤摯一日自塾歸聞乃父叱犢聲慨然曰小孝用力我粗知稼穡艱難忍令復從事於耘耔襁褓間乎於是棄其所學代父耕課晴雨兩自穗黍糜芑以逮瓜瓞果贏之細罔不經營而擘畫之而定省溫清之事亦未嘗缺失吾聞古有趙至者性至孝聞老父叱犢聲掩卷而泣人聞其故曰余幼讀使老父勞苦若斯故自悲耳後卒能發展所學以此方邦基先生何多讓焉先生治農業數年後倉箱充牣室家盈止漸臻小康矣書曰鑿牽車牛遠服賈用孝養厥父母先生知其大義復慨然曰一家無衣食則急一鄉無衣食則窮一國無衣食則危於是振米業以救人之飢崇布業以救人之寒往來運輸信譽卓著鄉人莫不熙熙而登春臺焉平生喜慈善業凡窮獨無告必傾囊以助之如不及然常詔其子貴榮曰凡人以報德爲先不可忘恩負義爲善最樂古有明訓汝其志之先世故居廿三家村厥後生齒衍繁先生篤友于誼將舊宅

讓與弟姪輩下築於本鎮西南營建大廈六階兩楹棧屋櫛比地當水陸交通帆檣林立班孟堅所謂紅塵四合煙雲相連盛矣夫商業之繁榮亦彷彿得其意矣先生生於清同治丁卯年某月某日民國辛巳年某月某日卒享壽七十有五葬妯娌山牛舂村之阡德配周夫人享壽六十有六子貴榮字宗德武進中學肄業兼祧胞弟子楊後孫五長如資蚤世次柏春國立復旦大學肄業三麗春梁豐中學肄業四泳春江蘇省立南菁中學畢業五同春江陰縣立中學肄業女四長適青陽章嘉惠次適青陽王可觀三適青陽周家祺先卒四亦適周氏爲繼配孫女七四正青陽初中畢業五渭六安七靜均幼讀子孫振振深望其謹守祖考之彝訓紹承先德云

論曰余弱冠時肄業江陰南菁書院居蓉城者四稔見其風氣樸質崇文尚義心輒嚮往之惟近今以來吾蘇人士多有廢經不讀者然聞澄江風俗尙能如舊讀書行善居今世爲尤急矣吾傳邦基先生爲之神往不置也

### 江陰郁詠唐先生家傳丁亥

師道立則善人多有訓蒙師有成德師有傳道師師之格不一其爲教亦不一小以成小大以成大是故師也者文化通塞之根源而世道人心因以晦明升降者也吾聞郁詠唐先生遺行喟然歎曰師道其於今未墜乎先生姓郁氏諱棣詠唐其字江蘇江陰縣歲貢生例授按察司經歷曾祖諱誼數祖諱某考諱介祉增貢生兄弟凡幾人先生居長幼穎悟過人好學不倦弱冠補博士弟子員旋食廩餼邑中長老咸以大器目之先生益殫志精研自六經外旁逮歷史諸子百家靡不蒐討治古文辭壹以桐城姚姬傳先生爲宗曰此文章正軌也平居出所學授生徒爲人師歷四十年自澄江教讀外嘗客梨川客蓉城客貴陵絳帳所蒞皆以姚氏考據詞章義理三者不可偏廢爲主旨而壹歸於有用嘗曰周易明訓多識前言往行以蓄其德